

YOGUIBATĒ PABORO ISANGUENAQUINERI CORINTOSATI

Paboro ibetsataigari Corintosati.

1 ¹¿Aintajeguibi, nopiguemisantacagane canta Corintoquĕ? Naro Paboro nasanguenataiguimiro oca. Icoiguĕna Tosorintsi iragátane Quirisito Ira jitacha Jesus aisati. Itsibatina yaca opiguemisantacagane ira jitacha Sósitenes. ²Nasanguenataiguimiro obiro quemisantatsiri ira botoibiritari Quirisito aisati Tosorintsi canta Corintoquĕ. Obiro yosaasĕretaiquĕ Jesoquirisito. Aroquenta piquemisanqueri Atingomi iniacaninataiguĕmi caninari. Yamai pomatsiguengataigacari Iriro aisati picantaigari antagaisati quemisantatsiri negaraca itimaigui ira abentaigari Atingomi. ³Nocoguini pĕrosati ingábintsaiguemi Pabati Tosorintsi aisati iromagoriasĕretagauemi arota intimacagaiguemi caninasati. Ingantaiguemirota Iriro aisati Atingomi Jesoquirisito.

Paboro icarasiaqueri Tosorintsi icábintsaiguĕrinta Corintosati.

⁴Pĕrosati nacarasiatiri Tosorintsi aroquenta icábintsaiguĕmi panirootipaque obirojegui cara piquemisanqueri Jesoquirisito. ⁵Aroquenta piquemisanqueri Quirisito, yoganinasĕretaiquĕmi, ipasiniatitacagaiguĕmi. Yamai pinibataigui basiniati aroquentoriasĕretagauemi arota

intimacagaiguemi caninasati. Ingantaiguemirota Iriro iquiancagaiguĕmi basiniati. ⁶Aroquenta omoncarapa irinibare Quirisito ora igáquena nocomantaiguĕmi jirai, yoganinataiguĕmi cara icanque Iriro. ⁷Aisati icantacagaiguĕmi Jesoquirisito pintineri antagaisati ora ininti Iriro arota pintimobitaigueri caninasati irooti cara piguiaigabaqueri cara iribocapae Atingomi. ⁸Iromitocotaiguĕmi aiquero pijátanĕtigue pinguemisanтанаqueri Quirisito irooti cara cataguitieriquĕ cara ingonijapae Atingomi arota quero pairi aguibitaquimirone pairoraca. ⁹Pĕrosati imoncaratiro Tosorintsi ora icanti. Iriro coiguĕmi arota pigóigueri Itomi aisati pinguengasĕretaiquemari Atingomi Jesoquirisito.

Icanque Paboro: “Pinintobagaiguema”.

¹⁰Nopiguemisantacagane, nocogasanti pingantaiguema caninasati. Caninataque cara pinguengasĕretaiquema. Teni ongomeite pinganaaitobaguima. ¹¹Nacantaiguĕmi negaca, nopiguemisantane, icomantaigapĕnanta omeraropague Coroe cara picanaitobagaigaca canta. ¹²Yamai nigóque ainta obirojeguiquĕ ira cantatsi: “Naro irogomere Paboro”. Aintasati basini icanti: “Naro irogomere Aporo”. Aintasati icanque: “Naro irogomere Sejas”. Aisati ainta icanĕ: “Naro

irogomere Quirisito”. ¹³¿Casiriconiatipagueco ini Quirisito? ¿Nipëicobiritaiguë mico naro? ¿Naroco pobaotisabiritai-gaca? Tesonori. ¹⁴Yamai nacarasiaqueri Tosorintsi tenta nomaotisataiguemi naro. Paniro nobaotisatëri ira Quirisipo, aisati Gayo. ¹⁵Aro quero pairi cantasitachane: “Nobaotisabiricari Paboro”. ¹⁶Aisati, nobaotisataiguëri imatsiguenga Isitéjana. Teni nanguengairi basini ira nobaotisatë.

¹⁷Teni iragátina Quirisito nomaotisataiguëri matsiguenga, patiro igáquena nongomantaguetiri ora Caninaro Nibarintsi. Icoquini Quirisito nongomantëgotëri catingasati arota inguemobëro antagaisati matsiguenga, inguemisanqueri Jesoquirisito, aro iragabisaicotajiri Tosorintsi. Aro quero nocomantëgotasitari Ira Quirisito cara icamobicái.

Cara igótabela matsiguenga aisati cara igótasanti Tosorintsi.

¹⁸Nocomantëgotëri Quirisito icamobicái corosiquë, carari ainta matsiguenga isërontaigacaro icanque: “Itsoigani Paboro”. Irianti jätënguistsine cara Sharincabeniquë tenta irabisaicote. Carari igóiguë eiro yogabisaicotajái Tosorintsi itasorintsibiricái cara aquemisanqueri Quirisito. ¹⁹Jiraisonori isanguenaque comantantatsiri:

Icanque Tosorintsi: “Nogótacaguiri ira ogótabetachari cara te irogóte; te ingantina nibega Naro, Naronta ogótasantotiro omagaro. Aisati nobegopitairi ora iquenga ira quingabitachari”.

Paboro itoroqueri ira Corintosati.

²⁰¿Atiraca ingantima yamai ogótabetachari? ¿Atiraca ingantima ira ogomeantiro isanguenare Moisés? ¿Aisati atiraca ingantima ira

ogometobagabetachara yaca quibatsica? Aroque icanqueri Tosorintsi ira ogótabetachara icanantajari ira te irogótëmate. ²¹Igóti Tosorintsi cara ainta sërari ogótabetacha quero yareta iriati igótiri Tosorintsi. Iroto iquengaguëca Tosorintsi iragabisaicotajiri matsiguenga ira quemisanquerine cara Nibarintsiquë Caninaro. Cara nocomantëgotëri Quirisito ainta tojai isërontaigabacaro Nibarintsi. ²²Ira joríojegui icogaigui cara natasongante ora te oneingani jirai arota iraniaantanguena itsibatina Tosorintsi, carari ira cagari jorío, irianti Guiresiasati, icogaigui cara nogótasantacaguiri ora irorai ogótagantsi iquengaiga iriati. ²³Përosati nocomantaguetiri matsiguenga nocomantëgotiri cara icamobicái Quirisito corosiquë arota iragabisaicotajái. Icomëtoacaror joríojegui; iroto iguisaneintaguëquina jorío, aisati isërontaiguëna Guiresiasati, icanque: “Te ongomeite ora yogomeanti Paboro”. ²⁴Ainta ira icoiguë Tosorintsi, jemita iriro jorío, jemita iriro Guiresiasati, ora nocomantaguequeri poniaguëri itasorintsite Quirisito iragabisaicoontëmari ira quemisanquerine. Iroto aisati igótacqueri matsiguenga Tosorintsi Irirota ogótasantatsi. ²⁵¿Pairo itsoingobitaguëri matsiguenga Ira Tosorintsi? Iriro obantasantatsi igóti. Aitosati Iriro obantasantatsi isintsiti. Teni irine matsiguenga cantimarine Iriro.

²⁶Nopiguemisantacagane, pinguengauguema ati picantaigaca. Isërontaiguëmi pomatsiguenga ira te inguemisante, icancoquemi: “Te irogóigue quemisantatsiri, teatisati irine itingomi irirojeguiquë. Te irobate pairiraca”. Aisonori teni irini tojai ogótagantatsiri obiroquë. Teatisati obatacagantatsiri. ²⁷Isërontaiguëmi matsiguenga,

carari Tosorintsi icoiguëri ira te irogóigue, carari yogabisaicotajiri arota iripasiguitaiganaque ogótatsiri. Aisati icoiguëri ira te irisintsitaigue arota iraguibasiguitiri ira itingomipague. ²⁸Icoigasantaiguëri ira te inganinate aisati ira imaintaigui matsiguenga. Ira te inganinate icoiguëri Tosorintsi arota iraguibasiguitaigueri matsiguenga ira jitasitacha caninari. ²⁹Icanque negaca Tosorintsi arota catingsatiquë Iriro quero pairi jitachane caninari. ³⁰Carari yogabisaicotajái Tosorintsi yoganiataái aroquenta aquemisaiguëri Jesoquisito Itomi. Igótasanotacái ora icantocobentái. Aisati yoganinatasantacái, yoguëteséretái. Itomintacái iraisationori. Ijocobentajairo ora acantaguëti te onganinate icamobicáinta Quirisito. ³¹Isanguenaque comantantsiri jiraisonori Sanguenariquë:

Quero aniacaninata eati. Patiro
intsome angantocobentiri
Atingomi: “Iriro caninarisonori-
guinte”.

**Ati icanta Paboro icomantaguequeri
matsiguenga Caninaro Nibarintsi.**

2 ¹Nopiguemisantacagane, cara niáque jirai obirojeguiquë, nocomantaiguëmiro catingsati Irinibare Tosorintsi, te nongomantimi comëtaro nanibare arota piniacaninata naro caninari. ²Patiro nocoque nongomantëgotiri Jesoquisito Ira ipëicotaiguë matsiguenga, icamobicái. Teni nanguenguitsatimiro basiniati. ³Cara ninasegui obirojeguiquë jirai, notsoroque cara queroca catingsati nocomantëgotiri Quirisito. ⁴Te nanibate caninatsaro nanibare ora nigótabeca, carari naquenguitsatomotaiguëmiro Caninaro Nibarintsi irasi Tosorintsi. Omitocoquinanta Isëre oquemisantacaquemiro Irinibare Tosorintsi. Aisati

itasongobenquimi Iriro. Aro piquemisaiguëri. ⁵Nocoque pinguemisantiri Tosorintsi cara yoniaguëmiro Irinibare ora yogabisaicoontaimi aisa itasongobentaiguëmi Iriro, tenta iroro pabisaicoontima irinibare matsiguenga.

⁶Carari ninibatiri ora ogótagantsisonori ira quemisantasantatsiri, ira ogótasantiri Tosorintsi. Teni nanibataigue aisa ingantima ira te inguemisantiri Tosorintsi. Teatisati nanibataigue ibegaiga itingomipague ira camatsi omanapague. ⁷Ninibatëgotai-guiro ora ogótagantsisonori paniacha Tosorintsiquë ora ogometocotiri Quirisito. Te ogótingani jirai, carari yamai igótacacáiro Tosorintsi ora iquianca jiraisonori teraiquerai irobetsiquiro pairorapagueraca. Iquianca iragáqueri Quirisito iragabisaicotajiri antagaisati quemisanquerine. ⁸Ira itingomipague yaca quibatsica te irogóigue ora iquianca Tosorintsi cara igáqueri Jesoquisito Itomi yaca. Arome irogóiguero, querome ipëicotiri Quirisito querome icami Atingomi caninarisonoriguinte. ⁹Irore isanguenaque jiraisonori:

Aiti ora yobetsiquineri quemisantsiri Tosorintsi. Te oneingani, teatisati inguemocotiro matsiguenga, teatisati inguengaiguero, carari Tosorintsi yobetsiquineri ira nintaiguiri.

¹⁰Te irogóigue matsiguenga ora iquianca Tosorintsi, carari yamai Tosorintsi igótacacáiro eironta quemisanqueri. Yoniagancaro Isëre Tosorintsi aroquenta pigótasantiro Isëre antagaisati. Pigótasantiro omagaro ora iquianca Tosorintsi. ¹¹¿Pairi ogótatsi ora iquianca basini matsiguenga? Paniro igótiro iriati. Aisa ocanta teni pairi ogótirome ora iquianca Tosorintsi. Patiro

Isère pigóti. ¹²Teni anguengasëretima aisa acantari ira matsiguengajegui te inguemisante, carari ipasitacáiro cara icábintasantái Tororintsi. ¹³Cara inibatëgotëro cara icábintsaigacái Tororintsi, inibatancaro nibarintsi ora pogomecái Isère Tororintsi, cagaro irinibare matsiguengapague. Pogometocoqueri Tororintsi nibarintsiquë ora pogomecái Isère. Iroero aquemaguëquero eiro quemisantatsi pinancáinta Isère.

¹⁴Ira te inguemisantiri Quirisito teni inantimari Isère Tororintsi. Teatisati inguemiro ora pogometi isère Caninaro Tororintsi. Isërontacaro tenta inguemiro. Icantí: “Teni onganinate; teni onguemingani”. Quero pairi quemirone queroca Iroero quemaguiri Isère Tororintsi. ¹⁵Ira quemisantatsi pinancari Caninaro Isère iquemaquero omagaro aronta oquemacaguiri Isère Tororintsi. Ira te inguemisante icantocoqueri quemisantatsiri, “Teni nanguemiri iriro”. ¹⁶¿Aintaco ira ogótiro ora iquianca Tororintsi? ¿Aintaco ira ogometiri Iriroro? Tesonori. Carari eiro igótiro ora iquianca Quirisito pogomecáinta Isère Caninaro.

Te inguengauguema Corintosati.

3 ¹Aisati, nopiguemisantacagane, nigóque piquemisanqueri Quirisito jirai, carari terai pinguemisantantiro antagaisati ora pogometaguëmi Isère Tororintsi. Iroero ora te nongomantaguë taiguemi ora nocogabeca. Aisati picantaigari ibega itiomijani janequi, te pigótasante. Posigari irirai parintacha igóqueri Quirisito. ²Jirai, patiro nocomantaiguëmiro ora te ongomëtate. Iroonti cantaca tsomitsi ora yóga janequi terainta iraguëri ibatsa. Aisati obirojegui picantari janequi, terai pinguemisantantiro ora irasi Quirisito

irooti yamai. ³Terai pinguemisantanguero Isère Tororintsi terainta pinguengauguema. Pijonobaca, pipëgatsatobaca aisati picantari ibegaiga ira terai inguemisantiri Quirisito. ⁴Cara icanti paniro: “Naro irogomere Paboro”, aisati basini cantatsi: “Naro irogomere Aporo”, ¿Cantaiguëmi matsiguenga ira terai inguemisantaiguë? ⁵Pinetse. ¿Pairi ijita Aporo? ¿Pairi naro? Naantijegui iroeraro Tororintsi ipaguitaiguëna panirotipague ora nacantineri, nomitocotaiguëmi naquemisantacaguëmi.

⁶Naro osigari panguitatsiri; nocomantaguequemi ora Nibarintsi Caninaro cantaca oguitso. Imitocoquemi Aporo cara piquemisantaiganaqueri Quirisito; Aporo aisa icantari ira areincotiro nija oguitsoquë. Carari paniro Tororintsi yogaguëbiaquero. ⁷Iroero cagarina naro obatatsi cara nocomantaiguëmiro Irinibare Tororintsi; cagarisati Aporo obatatsi cara imitocoiguëmi piquemisantantëri Quirisito. Naanti panguitatsi. Irianti areincotiro. Carari paniro Tororintsi obatatsi Irironta agaguëbiaquero oguitso iroontinta Irinibare. ⁸Aisati imoncaratobaca ira panguitatsi aisati ira areincotiro. Aisati icantobaca. Ira casintaro panguirintsi iripënantëri panirotipague ira antineri. ⁹Aisati nacantari Aporo, naantijegui iroeraro Tororintsi. Obirojegui quemisantatsiri aisa picantaro panguirintsi ora intira Tororintsi. Aitosati picantaro pongotsi ora yobetsiqui Tororintsi. ¹⁰Naro aisati nacantari ogótasantatsiri yobetsiqui pongotsi. Icábintsëna Tororintsi nantineri cara nocomantëgotëri Quirisito. Aroque noguëmiro otingomipoa carari cagaro anchapoa, Irianti Quirisito. Yamai yobetsiquini

basini; yogometocoquimiri Quirisito. Caninataque iragamema antagaisati ira antatsi. ¹¹Quero pairi oguiro basini otingomipoa. Aroque noguéro naro. Teni inae basini. Ora otingomipoa, Irianti paniro Jesoquirisito. ¹²Ira obetsicatsi pongotsi, ¿Pairo irantëmaro? ¿Irantëmaroco oro, quirequi, mopë caninaro? ¿Oraco anchato, tobari, choco? ¿Ora coshori? ¿Oraco patsagatsi? ¿Inganquero ora caninaro, oraco te onganinate? ¹³Aiquenta ongonijaque ora yobetsiquë paniropague irogótasantacaquerinta matsiguenga Tosorintsi. Ora obetsicaga pongotsi caninarosonori, quero pitaga. Aroca obetsicabitëma ora te onguëshote, aro otaquima. Cara cataguiteriquë cara iribocapae Jesoquirisito irogóontasantë maro antagaisati ora intineri iromeraro caninarosonorica. ¹⁴Queroca pitaga ora yobetsiquë matsiguenga iroronta caninaro, aro inganqueri Tosorintsi: “Caninasati picanquero”. ¹⁵Aroca otaquema ora yobetsiquë quemisanta-tsiri, tenta onguëshote, iragasëretasantëma, carari iragabisaicotajiri iriro Tosorintsi. Quero iáti Sharincabeniquë. Querootsati icantiri Tosorintsi: “Picanque caninasati”.

¹⁶¿Teco pigóigue pinaiguëmi Isëre Tosorintsi obirojeguiquë? Obirojegui cantaquibi ibango. ¹⁷Queroca pomisantiro ibango Tosorintsi, aroca pamasiquero, ingasitgataiguëmi. Ocaninatasanti ibango Tosorintsi. Ora ibango obiantieguinta quemisantsati botoibiritari Tosorintsi piquemisantaiguërinta Irero. ¹⁸Quero pamatobita obiati. Aintaca paniro obirojeguiquë iquianca iriati ogótatsiri yaca quibatsica, yamatobica iriati. Ijtabeca iriro caninaro ora iquenga. Caninataque inguenguema aisati inganque: “Arosataanti nigóque. Pogometina”. Aro

irogótasantacaqueri iriro Tosorintsi.

¹⁹Ainta tojai ira te inguemisantiri Tosorintsi. Ijica igóque iriro, carari Tosorintsi iniaqueri te irogótëmate. Jiraisonori isanguenague:

Ira tsimiripague ijtabeca tiguëti águirine, iroro cantënguicha iromaboquëri matsiguenga iráqueri iragamaguëri. Aisati icantari antagaisati ira jitabitacha igótasanti, omanapague iromaboquëri Tosorintsi iraguipasisguëtëri.

²⁰Aisati ocanti Sanguenari jirai:

Igóti Atingomi te onganinate ora iquengaigabitaca ira jitacha ogótasantsiri.

²¹Caninataque quero pairi aguiatirine matsiguenga; paniro pinguemisantiri Quirisito. Piguatiri Irero. Aisonori yobetsicaiguëmiro Tosorintsi antagaisati ora inatsi arota pinganinabentaiguero. ²²Irero nacantaguëtaiguëmi: igáquena Tosorintsi cara nomitocotaiguëmi. Aisati igáqueri Aporo, aisati Sejas, iromitocotaiguëmi aisati. Ipaiguëmiro Tosorintsi omagaro inatsi quibatsiquë arota pinganinabenquero. Aroca përosati pintime, pinganinate. Aroca pingamaque, aisati pinganinate. Pinganinabentiro ora inatsi yamai, aisati ora inënguitsine aiuenta iroronta pasiegui. ²³Aisati obirojegui irasi Quirisito: piquemisanquerinta icaninabenquimi Irero. Aroquenta Quirisito irasi Tosorintsi icaninabenqueri Irero Tosorintsi.

Ora icantaguë iragátane Quirisito.

4 ¹Yamai pigóiguëna narogui iromeraro Quirisito. Igáquena Tosorintsi noniaguetaiguëri matsiguengajegui ora iquianca Tosorintsi jiraisonori ora imánaque, te irogótiro matsiguenga. ²Caninataque

inganquero iromeraro antagaisati icocaqueri casintari. Aisa nacanta nocogasanti nanganquero omagaro igáquena Tosorintsi cara nongomanta-santaiguëmiro catingasati Irinibare Tosorintsi. ³Jemita ora pingueincoquina obirojegui. Jemitasati ora ingueincoquina matsiguengajegui. Naro teni nongomantëgotima caninarinaca naro. ⁴Najica naro te nangantaguetu ora te onganinate, carari quero nacanti: “Naro caninari”. Paniro Atingomi comantëgotënane naroca caninari. ⁵Iroero nocomantobitaiguimi yamai, quero picantocotiri pairiraca: “Picantaguetomotiri Tosorintsi”. Aiquenta iribocapae Atingomi irosanguëguitetocopëro omagaro ora mánabitënguicha yamai tsitiniguitiquë. Irogónijanquero ora icanque matsiguenga aisati ora iquianca. Pairiraca iraniacaninatapë Atingomi, ingantaiguëri Tosorintsi: “Picaninati”.

⁶Pinetsaigue, nopiguemisantacagane. Nasanguenatococa naati aisati nasanguenatocoqueri Aporo arota pigóigue quero poguibatiri pairiraca matsiguenga. Quero poguibatiri paniro iroontita pomaintiri ira basini. Patiro pinganque cara ocanti Sanguenari. ⁷¿Pairo pijibirica obiati obatatsiri? ¿Teco Iriro obetsicáirone Tosorintsi ipaáiro antagaisati ora asinta? ¿Aitico pasi ora te imemiro Tosorintsi? Aroca ipëmiro ¿Pairo piquengasantobita obiati aisati cantaca te Tosorintsi pemirone? ⁸¿Aroque págaiguëro obirojegui omagaro ora ininti Tosorintsi imaiquemi? ¿Obirojegui yamai casintachari? ¿Yamai obiroco itingomi pigáanti, naroueraí pijocaiganaque jaaquerora? Nocogabeca aisonorime pigáanti pisobicaiguëme pigáantomen-toquë, arota nantsibataiguëmime narouegui aisati pigáantanequë. ⁹Najique

Tosorintsi yogaiquëna carantatsiri narouegui iragátane cantaca iromeraro matsiguenga. Inetsaiguëna matsiguengajegui ingantocotaiguëna: “Teni ingomeite quemisantatsiri; caninataque ingamaigue antagaisati”. Aisati inetsaiguëna ironomire Tosorintsi.

¹⁰Icantocotaiguëna matsiguenga cara te naneicotima aroquenta noguiataiguëri Quirisito. Inibatëgotasitaiguëna: “Te irogóte”. Carari piqueincotaiga obiatiegui pigóigue omagaro irasi Quirisito. Aisati obirojegui sintsiri, carari te nasintsite narouegui. Iniacaninataiguëmi obirojegui matsiguenga, carari imaintaiguëna naro. ¹¹Përosati irooti yamai nitaseaque, nomiretapinique, aisati nitsoincotaigaca nomanchaqui. Ipasataiguëna matsiguenga. Teni ine nasi nobango: naquenaquenatagueque.

¹²Nomagotaiguëni nantaiguininta nobocoquë. Cara inguisatsataiguëna matsiguenga, nomanocotanëtiguiiri Tosorintsi: “Pabati, pingantaneintëgotiri iraegui quisatsatëna”. Aisati cara inguisaiguëna catsimari, aro nabequero, quero nipëgataari. Përosati naquenguitsataguequeri matsiguenga ora Caninaro Nibarintsi. ¹³Aroca ingantocotasitaguequina, notabitaigaba-queri antsinisati. Icantaguëna: “Obirojegui cajara”. Icantocoiguina: “Teni ingomeite Paboro aisa itsipajegui”. Icantaguina cantacha nega irooti yamai.

¹⁴Teni nasanguenataiguemiro oca arota naguipasisiguitaiguemi, iroonti nacamanaaiguimi nanintaiguëmini cantaquibinta nasisonori najaniquite obirojegui. ¹⁵Jirai paniro naro naquemisantacaquemiro cara nocomantaigapëmiro ora Caninaro Nibarintsi irasi Quirisito. Naro aisa nacantari ibega piri naquemisantaca-queminta. Yamai ainta tojai basini ira

ogometaiquimi cara aikuero pinguemisaigaanaqueri Quirisito, carari teni irine tojai casintimi panironanta naro cantaquina piri. ¹⁶Iroero ora nacantasantobitaiguëmi piguiataiguena. Aisati pingantaiguena nibega naro. ¹⁷Nagáqueri Timoteo cara iriatë obirojeguiquë. Naquemisantacakeri jirai. Yamai iriro cantaca notomi nanintane. Icanque omagaro ora icogui Atingomi. Yamai inguiancagajimiro ati ocanta cara nocomantëgotaguequeri Jesoquirisito cara atiraca yapatobiritagari Quirisito quemisantatsiri. ¹⁸Ainta obirojeguiquë ira quingasantabitacha iriati, icanti: “Querojenga ipocaji Paboro yaca”. ¹⁹Carari aroca iranintacakuina Atingomi, aro naniaigaantimi obirojegui canta omanapague. Quero naquemisantasiparo ora irinibare ira quingasantacha iriati, carari nogópëri ira aisonorica intasantineri Tosorintsi. ²⁰Iriroca Atingomi Tosorintsi, quero inibatasita ora caninarsaro, patiro antëneri ora caninaro icogui Irirero. ²¹¿Pairo picogaigui? ¿Picoguico cara najátasiquimi nanguisatsataigapëmi, picogaiguico nanintaigapëmi aisati nangantaneintëgotaigapëmi?

Inintacakeri Corintosati ira te inganinate.

5 ¹Icomantëquina pitsibataigari ira águero irajitane. Aintanta sërari yáguero inirotsari ora yágabita iriri. Teni ingomeite ira cantiro negaca. Tesonori ingantëmatiro negaca matsiguenga ira te irogótiri Tosorintsi. ²¿Përosati piquengasantaiga obiatiegui? ¿Pairo te pigasëretobitaiguema? ¿Pairo te pijocobitaigueri ira cantëro ora quimingari obirojeguiquë cara papatotaiga? Caninataque quero pinintacaguiri ipoqui. ³Yamai teni nantsibataiguemi, carari përosati

naquengasëretaiquëmi, aisati nangantimame nineme obirojeguiquë. Aroque nocomantëgotëri ira águero inirotsari. Teni ingomeite. ⁴Popatobiritaiquemari Atingomi Jesoquirisito. Aro ora itasorintsite ontsibataiguëmi obirojegui, ogótacagaiguëmi Isëre ora caninaro pinganque. Aisati naro nanguengasëretaiquëmi yaca. ⁵Pomisotocaigueri ira antaguetatsi ora quimingari arota iratsipiriacaqueri Satanás. Aro ingasitígatagantëri Tosorintsi arota iranajajima, ingomantë gotëma cara icantaguetiro ora te onganinate. Aique aroca irojocajiro quimingari, iragabisaicotajiri Atingomi Jesoquirisito cara iribocapae.

⁶¿Pairo piquengasantobitaiga obiatiegui? ¿Teco pigóigue aitica arosata ora piponganta pan, aro otsatenganëro omagaro pan oponganë? ⁷Pijocajiro antagaisati ora te ongomeite cara obirojeguiquë quemisantatsiri. Ora quimingaro poguimingataiganaquimi potsatengaiganaquimi posigaro ora piponganta pan potsatenganëro omagaro pan. Aro pinaiguë caninari cantaca pan te ine ora piponganta. Picaninataigui obirojegui yamai aroquenta icamobitaiguëmi Jesoquirisito yoganinasëretaiigami. Irirero cantaca oisha ira camobitaiguëri joríojegui jiraisonori canta Ejípitiquë cara yogabisaicotaigairi Tosorintsi. Yabisanaqueri jonoquë ironomire Tosorintsi te iragamaguiri jorío aitinta iraraa oisha. ⁸Aro intsome angante ora caninari osiaquimaro pan ora te ine piponganta. Yamai imitocotaigái Quirisito arota quero amatobianti, querootisati aguisatsatanti, querootisati acantiro pairorapagueraca cagaro caninaro. Ora te onganinate posigaro pan ora inatsi ora piponganta.

⁹Jirai nasanguenataiguëmi, nacantaigabitëmi quero piconagari ira antiro tsinane cagaro iina. ¹⁰Te nangantimi: “Quero pitsibatari ira te inguemisantiri Tosorintsi”. Te nanguincotaiguëri irirojegui te inguemisante ira antiro cagaro iina, ira cogatsi ora yasinta basini, ira cositatsi, ira manëgotabitari ibabane cagari Tosorintsi. Aroca pijocasantanëri irirojegui tigueti pinguenajera. ¹¹Nasanguenatocotiri yamai ira cantatsi: “Naro popiguemisantacagane”. Aroca intiro tsinane cagaro iina, quero poguëshonitaigari. Aisa icanta ira cogasantiro ora yasintagueta basini, aisati ira manëgotabitari ibabane cagari Tosorintsi, aisati quisatsatasitachari, aisati singuitachari, aisati cosirinti. Yamai nacantasantaiguimi, quero pitsibatari papëgotiri irirojegui. ¹²⁻¹³Naro quero nocomantëgotiri iraugui te inguemisante; paniro Tosorintsi ingomantëgotaguëri ora inganque aisati negaraca iriáiguë. Carari obirojegui pingomantëgotaguëri ira popiguemisantacagane. Iroro yamaica pijoguëtaiguëri ira te ingomeite ira picarataigabitaca. Quero pijitajiri popiguemisantane.

Cara irisintsitsatobaquimaca quemisantatsiri.

6¹Aroca pinguisaneinqueri popiguemisantacagane, ¿Caninataqueco pabenquimari ira jitacha joes te inguemisante arota ingomantëgotëmi pairoraca pinganque? Teni. Caninataque pabentimari basini popiguemisantacagane. ²¿Teco pigóiguëri iraugui quemisantatsiri comantëgotaguërine antagaisati matsiguenga ora inganque? Aroca pingomantëgotaguëri omagaro matsiguenga aiquenta, ¿Pairo te

pingomantëgobiritiri popiguemisantacagane yamai ora ingantaguetomotimi ora arosata? ³¿Teco pigóigue aiquenta ongomantëgotaguëri eiro ira ironomire Tosorintsi? Pingomantëgotërica iriro, ¿Queroco picantocotiro yamai ora arosatapague yaca? ⁴Aitica yamai piguisaneintobaga, ¿Pairo pabentobitaggi ira te inguemisante, ingomantëgotëmi pairoraca pinganque? ⁵Nacantaiguimi negaca arota naguibasiguëtaiguëmi. ¿Teco irine obirojeguiquë paniro obetsiquinerine popiguemisantacagane cara inguisabacaguimanica? ⁶Carari piguisaneintobaca obiro aisa popiguemisantacagane, pabencari joes ira te inguemisante. ⁷Pitsipiriasitaigaro cara pabentaigacari joes ira te inguemisante. Teni onganinate picantaigui negaca. ¿Pairo te pinintobitacaguiri popiguemisantacagane ingantëmiro ora te ongomeite? ¿Pairo te pinintobitacaguiri jemita ingositimi? ⁸Te pingantaigue negaca. Picantobagaigacaro obiati ora te onganinate. Aisati picositobaca. ⁹⁻¹⁰Ira antaguetatsi quero yareta canta igáanti Tosorintsi. ¿Teco pigóiguero oca? Quero pamatobitobagaiga. Quero iáti canta Atingomiquë ira antiro tsinane cagaro iina. Quero iáti ira manëgotabitari ibabane cagari Tosorintsi. Querootisati ira tsigantobagachari, querootisati ora tsigantobagachari. Querootisati ira antiri sérari. Querootisati cosiantatsiri, querootisati ira coguëtaguetiri ora yasintagueta basinpague; querootisati singuitachari; querootisati nibatocotaquetasitachari; querootisati ira ágabitsatiri ora yasinta basini. Iraugui cantaiguero cantacha negaca quero yaretaro iragáantane Tosorintsi. ¹¹Aisati picantaigabitari iraugui antiro quimingari. Iroro cantënguicha

yoguëtetaigaimi Atingomi yoganinasëre-
tami Iriro aisati Isëre Tosorintsi
opasiniatitanaimi. Iniacaninataiguëmi
Tosorintsi cantaca te pingantaguetëmate
pairoraca te onganinate cara
piquemisantaiguëri Atingomi
Jesoquisisito.

Yoganinatacái Atingomi eiro iraisati.

¹²Ocantagani: “Caninataque
nanganque pairorapagueraca ora
inintacaquena Atingomi”. Carari aroca
nangantassitamaro pairoraca, quero
omitocotina. Teni nongogue ogabeina
ora nameta. ¹³Aiti operi ora aquemara,
aisati asegoto aisati omaretsa cara piáti
operi. Carari aiquenta irobagairo
Tosorintsi ora ametaiga yamai. Quero
ocogui api cara Jonogaguítequë. Carari
te iroro irobetsicobitái antiro tsinane
cagaro ajina; iroonti yobetsicasitacái
Atingomi omanocotiri Iriro eironta
iraisati. Aisati Iriro asiati. Aisatinta
inintasantacái icogasantí intimacacái
eiro. ¹⁴Aisati icanta Tosorintsi
icabiriqueri Quirisito, yoganiatairi,
aisati iritosongajái eiro, ingabiritajái.
¹⁵Nobaco iroonti nasi. Iroro asi nobatsa.
Aisa icanta quemisantatsiri irasi
Quirisito. Antagaisati quemisantatsiri
aisati icantaro ibaco Quirisito, iguiti,
iguemita, iroqui, omagaropague. ¿Teco
pigóiguero oca? ¿Caninataqueco águëro
irasi Quirisito antanquimaro tsinane
antagueantatsiri? Tesonori ongomeite.
¹⁶Aroca intiro sërari ora tsinane
antagueantatsiri iniaqueri Tosorintsi
aisa inganquima cara yágasantiro iina.
Iroonti cantaca ibatsa iriro. ¿Teco
pigóigue Sanguenari ocanti:

Cara iráque iina sërari, ira pite
inganquima paniro ibatsa iriro?
Tosorintsi iniaqueri paniro. ¹⁷Carari ca
coshonica oguëri Atingomi, antsibasëre-
timari anganquimari ibega Iriro.

¹⁸Quero pintiro ora cagaro pijina. Quero
pintiri ira cagari pijime. Pairoraca
icantagueti matsiguenga te onganinate
yamasitaiguëri imatsiguenga; carari ira
antagueantatsi cagaro irasi, iriati
amasiquenguicha. ¹⁹¿Teco pigóigue
pinanquimi pobatsaquë Caninaro Isëre
Tosorintsi? Igáquemiro Tosorintsi
coshoni oguëmi. Yamai teni pasintima
obiatiegui; Irianti Tosorintsi asintimi
²⁰arocuenta yamanantaiguëmi Quirisito
cara icamobitaiguëmi corosiquë.
Yamaica pairorapagueraca pingantaiguë
pingantineri Tosorintsi. Aro
iraniaiguëmi matsiguenga ingantaiguë:
“Caninarisonori Tosorintsi. Yoganinata-
santaiguëri Corintosati”.

Icomantëgotëri ira águenguítsine iina.

7 ¹Aro cani pisanguenataiguëna,
posamitaguetina. Yamai notabitaiga-
naquemi. Najique naró caninataque
quero yágui sërari iina. ²Arota quero
pintiro tsinane cagaro pijina, querota
pintiri sërari cagari pijime, caninataque
págue pijina panirootipague sërari. Aisati
caninataque omagaro tsinane águe ojime
panirootipague. ³Caninataque iranintaca-
guimaro iina ontaguimari. Aisati
onganquima iroro, onintacaqueri ojime
irantiro. ⁴Ora iina quero pigáta irooti,
irianti agátirone ojime. Aitosati quero
igáta iriati sërari, iroonti iina agátirine.
⁵Quero pometopitaro pijina. Aisati,
tsinane, quero pometopitari pijime.
Aroca pinguenguiguëma: “Quero
aniobaca arosata cataguiteri arota
omanocotasantiri Tosorintsi”, aro
caninataque. Aique pintimacagobaguima
aisati querota intaguimi Satanás ora te
onganinate. ⁶Teni nagátaiguemi: “Págue
pijina”. Carari pinintica páguero, aro
caninataque.

⁷Nocogabeca pingantaiguename
nibega naró, carari ipaguetacái

Tosorintsi panirootipague. Teni aisa angantaiguema omagaro. Teni ine najina carari caninasati natimi. Ainta basini sêrari, queroca pine iina, aro Satanás irantacaqueri ora te onganinate, iroonti tsinane icogasanti. ⁸Yamai nongomantaiguimi obiroya te ine iina aisati ora ogamaimentaga: caninataque pingantaiguema nibega nary, pintimasitima paniro. ⁹Carari queroca picantiro pitimasita, aro caninataque páguro pijina. Caninataque páguro pijime. Teni onganinate pingogasantabitima págué pijina. Aisati onganquima obiroya tsinane, te onganinate pingogasantabitima págué pijime. ¹⁰Yamai nongomantasantêro ora águenguitsi ojime. Teni nary comantimine, Irianti Atingomi comantasantêmine: querotasha pijoquiri pijime. ¹¹Aroca pijoqueri, quero págai basini. Caninataque pigatsitairi págairi ira págabita. Aisati nongomantasantêri sêrari, quero ijoquiri iina.

¹²Yamai nongomantêri basinipague. Te ingomantêgotiri Atingomi. Aintaca iina ira quemisantatsi te onguemisante iroro, aisati oninti ontimacaqueri, quero ijoquiri. ¹³Aisati, tsinane quemisantsiri, aintaca pijime te inguemisante, aisati ininti coshoni iroquimi intimacaquimi, quero pijoquiri. ¹⁴Aintaca tsinane quemisantatsiri, carari te inguemisante ojime, iriro te ingantimari ira tsoenguêri Tosorintsi iquemocoquerinta. Tosorintsi icanque: “Iriro ojime ora quemisanquinane, iriri ojaniquite. Nocogasanti inguemisantina iriro aisati”. Aisati aintaca sêrari quemisantatsiri, carari te onguemisante iina, iroro teatisati ongantimaro ora tsoenguêri Tosorintsi oquemocoquerinta. Ijique Tosorintsi: “Iriro iina ira quemisanquinane, iniro ianiquite. Nocogasanti onguemisantina iroro

aisati”. Tosorintsi iniaqueri ianiquite irianti itomi quemisantatsiri, iniacaninataiguêri icogasanti inguemisante itomi aisati. ¹⁵Cara aintaca sêrari quemisantatsi, ora iina te onguemisante, onintica ojoquiri ojime, aro ojoquirita. Aisati aintaca tsinane quemisantatsi, ira ojime te inguemisante, iraninquica, irioquiroya. Quero nacantiri quemisantsiri coshoni iroguero iina te onguemisante onintica ojoquiri. Aro ojoquirita. Aitosati quero nacantiro tsinane quemisantatsi coshoni oguero ojime ira te inguemisante inintica irojoquiri. Aro irojoquiroya. Teni ingoque Tosorintsi inguisabacaguima. ¹⁶Tsinane, aroca coshoni poguêri pijime ira te inguemisante, ¿Aroca pigabisaicotacagantêri? Aisati picanta obiroya, sêrari, aroca coshoni poguêro pijina ora te onguemisante, ¿Aroca pigabisaicotacagantêro?

¹⁷Aroque icoigaiguêmi panirootipague Tosorintsi, yogabisaicotajimi. Yamai caninataque pintaigueneri Atingomi antagaisati ora icogui Iriro. Ocari oca nocomantaguetiri iraegui botoibiritari Quirisito negaraca niátagueque. ¹⁸Jirai icoigaiguêmi Tosorintsi. Ainta obiroyeguiquê ira totacha iriantinta jorío jirai. Yamai quero pogasêreta. Aintasati ira terai iritotima cara icoiguêmi Tosorintsi. Quero pitota yamai. ¹⁹Jemita pitoca jirai. Jemita terai pitotima. Yamai patiro caninataque pinguemisantantiro ora icanquemi Tosorintsi. ²⁰Atiraca picantaiga jirai cara icoigaiguêmi Tosorintsi, pêrosati pingantima yamai. ²¹Cara icoiguêmi Tosorintsi, ¿Obiroca pobimantaga? Quero pogasêreta. Caninataque pintineri pobatorote. Carari aroca iragátajimi pobatorote, caninasati piguiatasantiri Quirisito. ²²Obiroca pobimantaga cara icoiguêmi Tosorintsi, jemita. Yamai

aroque yomisotocajimi Atingomi cara yoberantëmi Satanás jirai. Teca obiroyobimantaga cara yogabisaicoquemi Atingomi, yamai picantaigari ibimantaga irasi Quirisito. ²³Aroque ipë nabentaiguëmiro Jesoquirisito cara corosiquë ora picantaguetaigui te onganinate. Yamai quero popega. Quero popimantaa aisati. Quero picantaja quimingari pibega jirai. ²⁴Iroroyo, nopiguemisantacagane, nongomantaguëmi atiraca picantaiga cara yogabisaicotajimi Tosorintsi, përosati pingantaiguema.

²⁵Yamai nongomantëgotëro tsinane te oneimatiri sërari. Teni irogometocotiro Atingomi, carari nongomantaguëmi ora naquenga naro. Icabintsëna Atingomi, cara quero namatobitimi. Pigóiguëro oca. ²⁶Yamai aiti ora obomirintsitasantái. Iroroyo ora najique naro atiraca picantaiga yamai, caninataque pingantaiguema përosati. ²⁷Aroqueca páguë pijina, caninataque; quero pijoquiroyo. Teca ine pijina quero picogui págui pijina. ²⁸Aroca páguë pijina, caninataque. Aisati aroca águë ojime ora te oneimatiri sërari, caninataque. Carari páganquenica, obomirintsitasantaguëmi. Te naninte obomirintsitaguëmi pitsipiriaigue, iroroyo nacanquemi: “Quero páganti yamai”.

²⁹Yamai nongomantëmi, nopiguemisantacaganeegui, quero ocosamaniti cara pintaiguineri Atingomi ora icogui. Teca ine pijina, pintineri Tosorintsi. Aintaca pijina, pintineri Tosorintsi aisati. ³⁰Aroca pigasërequima, quero pogasëreta cosamani. Aroca pinganinatë, quero picaninati cosamani. Aroca pamanantë pairoraca, quero piquenga ora pasi queronta pini cosamani. ³¹Caninataque pintimabequima yaca quibatsica. Aisati pinganinatantimaro ora inatsi yaca,

carari quero pinebetaro, quero picaninatantaro përosati queronta përo cara pini oca quibatsica, querootisati ora inaiquetatsi yaca. Otsongaima omagaro. ³²Nocogasanti naro quero pogasëretaiga. Ira timasitacha quingasëretapinintiro ora icogui Atingomi. Patiro, icogui iriro iraganinatiri Ira Atingomi. ³³Irari ira ágantatsi iquengasëretapinintiro ora yametaiga imatsiguenga arota iraganinasëretiro iina. ³⁴Tojai iquengasëretaguetiro pairorapagueraca. Ora tsinane te ágante aisati ora te oneiri sërari, tojai oquengasëretaiguero ora icogui Atingomi. Antagaisati ora onganque aisati ora onguengasëretë, ontineri Atingomi. Orari ágatsi ojime oquengasëretapinintiro ora pametaiga omatsiguenga arota oganinasëretiri ojime. ³⁵Ocari oca nocomantaguëmi nocoguininata nomitocotaiguemi. Te naninte nobomirintsitaguemi. Patiro nocogui pintimaigue caninasati, aisati pigóigue pintasantineri Atingomi ora pairoraca ingoque.

³⁶Pinetse, aintaca pisinto terai oneiri sërari aroqueca piquibiaque, picoguica águero ojime, aro caninataque. Aroca págantacaquero pisinto quero picantaguero ora te onganinante.

³⁷Aroca pomequimaro pisinto, aro caninataque; aisati caninataque aroca obomirintsitëmi onibatëntimi, pinganquero: “Aro páguero”. Caninataque pinte ora picogui, ora piquianca. ³⁸Aro caninataque págantacaquero pisinto ora te oneiri sërari. Aisati caninatasantaque pomequimaro. ³⁹Aroca águë tsinane ojime, coshoni oguëmari irooti cara ingamaque. Carari ingamaqueca aro caninataque yamai ágairi basini ojime. Carari paniro ágairi ira quemisantiri Atingomi. ⁴⁰Aroca onganque

ogamaimentaga ora nogometaiguëmi, caninataque quero págantaji, aro najique onganinatasantë. Aisati najique naro pogomequina Isëre Tosorintsi oca nocomantaiguëmica yamai.

Icomantëgotëri Corintosati ira ibatsa aroque ipëri ibabane.

8¹Yamai nongomantaiguëmi cara ati pingantaiguëri ira ibatsa aroque ipëri ibabane matsiguenga. Ibabane irianti ira yobetsicasita matsiguenga ira ijiti itosorintsite. Ipëri ibabane arota iraniacandinatiri iriro. Ijtabeca antagaisati irogótasantiri ati inganqueri ibatsa. Carari aroca ogótasitima eiro, aquengasantaigaca eati caninari. Icoígaái Tosorintsi anintobaganëma, omitocotobaganëma anguemisantansantanëri Atingomi, antime caninasati.²Aintaca jitabitacha igótasanti, iriati matobitacha; terai irogótasante.³Irari nintasantiri Ira Tosorintsi, iriro Tosorintsi igótiri.⁴Cara pisanguenarequë posamitëna ora caninataqueca ajagaiguëri ibatsa ira yóguineri ibabane matsiguenga. Igóiguë eiro te intosorintsite ira yobetsicasita matsiguenga. Paniro ini Tosorintsisonorini; teni irine basini.⁵Ainta inaguetatsi canta jonoquë aisati yaca quibatsica ira ijitasitari matsiguenga itosorintsite. Aro tojai inaguetatsi ijitosorintsisataguetaca, tojaisati itingomi,⁶carari igóiguë eiro ainta paniro Pabati Tosorintsi. Irero oniaganquero antagaisati ora aniaigui. Aisati yobetsicanontacái eiro. Aintasati paniro Atingomi Jesuquirisito Ira obetsiquëro omagaro, aisati yogabaisicotajái.

⁷Carari ainta opiguemisanepague ira te irogótiro oca nocomantaiguimica. Jirai yametaiga yamanopiantëri ibabane ira yobetsicasita matsiguenga ira ijiti itosorintsite. Aroca iraguëri ibatsa ira

aroque yóguëneri ibabane matsiguenga, ijique quemisantatsiri irasonori ira ijitosorintsitagueti. Te irogóte. Aroca iraguëri yamai ibatsa ira yóguëneri irosiacagomento matsiguenga, aro tojai irisëretimari ibabane iroguimingasëretanëma irajitabetima ora te onganinate iraguëri.⁸Carari ira aagui eiro quero yoganinatái catingasatiquë Tosorintsi. Queroa aaguëri quero yoganinasëretái. Aroca ajaguëri querootisati yoganinasëretái.⁹Pigamaiguëma obiati cara pijaguërica ibatsa querota pintaquëri ira popiguemisantane ora ijique te onganinate terainta irogótasantiro cagari Tosorintsi ira ibabane matsiguenga.¹⁰Aroca iraniaquëmi ira te irogóte cara paaguëri canta ibangoquë ijitosorintsitagueti, inganque: “Igóque iriro. Aisati nanganquimari ibega iriro najaguëri ibatsa irasi ibabane matsiguenga”.¹¹Pigóque obiro caninataque pijaguëri ibatsa. Irero te irogóte. Iroontita cara iraguëri inguëma: “Teni onganinate najaguëri. Ingasitgatëna Tosorintsi nacantaguetinta ora te onganinate”. Aro pintaquëri obiro ora te ongomeite. Iriatisati popiguemisantane ira icamobique Quirisito.¹²Te ongomeite pintaquëri ora te onganinate. Cara piquengasëretaguëri ora cagaro caninatatsi, pamasisërequëri, pintaquëri ora te ongomeite, te pingábintseri popiguemisantane cara icocaquëmi Quirisito.¹³Irero ora nocomantaiguëmi: aroca najaguëri ibatsa, irero nantagantë mari nopiguemisantane ora te onganinate, quero naaguëri ibatsa aisati, tenta naninte nantaguëri ora quimingari.

Icanque Paboro: “Pingantaiguëna nibega naro”.

9¹¿Teco iranintacaguina Tosorintsi pairorapageraca? ¿Teco naneiri Atingomi Jesus? ¿Teco naro iragátane

naquemisantacagaiguëmi? ²Aintaca basini te irógote naro iragátane Tosorintsi, carari pigótasantaigui cara igáquina obirojeguiquë. Yamai iraniaquemi basini matsiguenga cara naquemisantacaquemi, aro pigótagaui aisonori naro iragátane Atingomi. ³Ainta icantocoquina: “Te iragátiri Tosorintsi”. Yamai notabitëri: ⁴“¿Teco onganinate nope aisati nóguima naro Paboro aisati basini iragátane? ⁵Cara nanguenagueque nongomantëgotëri Jesoquirisito, aintame najina quemisantatsiri, ¿Teco onganinate nantentaguequimarome aisa nacantaigari ibega basini iragátane Atingomi, aisa nacantari ireintiegui, aisa nacantari Sejas? ⁶¿Paniroco naro natarobacaaque cara nipënabentiro noperi? Aisati nacantari Berinabé; itarobacaati iriro aisati. ⁷Nosiacagantai-guëmi: ¿Teco iripënabentapinintiri ira soraro? ¿Teco intsimiro oba ira panguitiro? Ira piratari ibaacate ¿Teco iráguero baacatsomija?” Aroque nacanqueri ira cantëgotina cagarina naro iragátane Atingomi.

⁸Nocomantëgotaiguëmi ora aniopiantaigui, carari ¿Pairo ocanti isanguenare Moisés? Irootisati ocanti. ⁹Jiraisonori isanguenague Moisés:

Quero poguineri cantiri itsobaquë sërari baaca ira agaticaguitiro tirigo, carari caninataque irape arosata.

¿Paniroco baaca iquengasëretiri Tosorintsi? Teni. ¹⁰¿Teco ingantococái eiro aisati? Aisonori icomantëgotacái. Yogomecái pairoraca caninaro anganque. Aroca inguigajiro quibatsi sërari cara imanguitantajimaro, icogui iráquero oguitso aiquenta. Aisa icanta ira obiguitatsi pairoraca aisati icogui iráquero iraisati oguitso. ¹¹Pinetse, aisa ocanta cara nopanguitëmiro pisërequë

Irinibare Tosorintsi. ¿Yamai opomirintsitomotimico pomagarantai-guenaro noperi, naguitsagare, pairoraca basini? ¹²Aroca popagarantasitagueitari basini ogomeantatsiri, ¿Teco onganinateme pomagarantiname naro? Carari te pomena tenta nanintiro. Jiraini piquemisantaigabaquero ora Caninaro Nibarintsi nocomantëmira cara nocomantëgotëri Quirisito. Tojai opomirintsitomoquina, carari te naninte nojocaguimiro cara piquemisanqueri Quirisito. Iro ro ora te nongoicotaguë timi pairoraca. ¹³Pigóguero ira saseriroti antineri Tosorintsi cara ibangoquë, yaagui ibatsa canta. Ainta ibatsa itaquineri Tosorintsi, aisati yaagagaranqueri iraisati ibatsa. ¹⁴Aisa ocanta, icanti Atingomi: “Caninataque ira quemisantatsiri imagaranquitigui ora icogui ira comantagueantiro Caninaro Nibarintsi”.

¹⁵Caninataqueme imagarantina pairorapagueraca quemisantatsiri, carari teni nongoicotëmatiri. Teni nasanguenataiguemini yamai arota pomaiguenaro pairoraca. Teni nanintiro. Nacanasëretanë cara te nongoicotimi. Arome águëna natasegane, quero namanimi: “Pomena noperi”. Aguinata, nangameta. ¹⁶Aroquenta nocomantague tiro ora Caninaro Nibarintsi teni nanguengasantima. Teni nomairebintsate icomantaguinaninta Natingomi. Queroca nocomantëgotiri ingasitgatëna. ¹⁷Aroca nongoque nongomantagueante, aro imëna Tosorintsi. Carari queroca nocoguero, ainta igáquena, imeratina jirai, ipënarora nantineri. ¹⁸¿Pairo yamai imëna? Caninataqueme nongogantimarome pairoraca, carari teni naninte nongoicoonte. Patiro nacasasëretëgotimi cara piquemisan-taiguëri Atingomi. ¹⁹Te poro meratinane, carari nantapinintineri

antagaisati aisatime nangantimarime ibega iromeraro. Nacanti negaca arota tojai matsiguenga inguemisantiri Atingomi Jesoquirisito. ²⁰Aroca nangarataiguëri jorío, nanganquimari ibegaiga iriro arota nanguemisantacaguiri. Aroca nangarataiguëri ira quemisantiro isanguenare Moisés, aisati nanganquimari ibega iriro cara nanguemisantacaguiri. Carari yamai te nanguemisantiro naro isanguenare Moisés, te obomirintsitina. ²¹Aroca nangarataiguëri ira cagari jorío, ira te inguemisantiro isanguenare Moisés, nangantaiguëmari iriro aisati nocoguininta nanguemisantacaguiri ora Caninaro Nibarintsi. Te nomaguisantajiro ora icanquena Tosorintsi; naquemisantasantëro ora icanti Quirisito. ²²Aisati, cara nangarataiguëri ira quemisantatsi arosata, nanganquimari ibega iriro, nanguemisantasantaganëri. Nangantaiguëmari antagaisati arota nanguemisantacaguiri. ²³Omagaro nacanquero cara inguemisantantaiguë maro matsiguenga Caninaro Nibarintsi. Aisa naro nacininatomotiro Caninaro Nibarintsi ora yogabisaicoontaina Tosorintsi.

²⁴¿Teco pigóigue isigaiganaca tojai sërari irogóontëmari pairiraca obaquenguitsine? Irobaque paniro ira sigasanotacha, aro imëri pairoraca ora jitacha peremio. Aisati pisigaiganaquima obirojegui págaiguerota pairoraca caninaro imëmi Tosorintsi. ²⁵Ira siganënguichane iragáquima caninasati iriati quero icanti pairoraca ora amasiquerine. Inganquero iriro iráquerota matseirontsi iroonti osi ora quero ocosamaniti. Aisa icanta quemisantatsiri cara coshoni iraguiatëri Atingomi. Aisati imaáiro Tosorintsi ora quero pisiguiriqui. ²⁶Aisa nacanta naro

nantineri Natingomi, quero nacantari sigasantachari ira te irogóte negaraca iraretima. Nantineri Tosorintsi nocoguininta inganquina: “Caninataque pisigopa”. ²⁷Nantasanotineri, te nangantëmate pairoraca basini arota, cara nocomantaguequeri basini matsiguenga ora Nibarintsi Caninaro, quero icantina Natingomi: “Te pintasanotinaro ora nococaquimi”.

Iquenguitsatocoqueri joríojegui jirai; aisati yogomequeri quemisantatsiri.

10 ¹Yamai, nopiguemisantacagane, nongomantëgotaiguëri joríojegui. Pigóiguë obirojegui ati icantaiga iriro jiraisonori cara isotocaiganaji Ejípitoquë. Iquenaguetaiguë canta tenta ontimingani. Pamamegapinintaiguëri iroirojegui mingori, aisati pitsiraatatëtaneri angaare, aganguijanta opiriatanë. Yoguimontiaiguëri omagaro jorío Tosorintsi. ²Yoguiataiguëri ira Moisés itingomi cara osobi mingoriquë aisati aganguijanta angaarequë. Yoguiataiguëri iquemisanqueri aisatime inganquimame imaotisabiriquimarime Moisés. ³Yapaiguë iraperi ora ipapinintaiguëri Tosorintsi. Aisati yóigaigacaro nija ora ipaiguëri Tosorintsi ⁴ora contiaatapënguisti mopëquë. Yoguëneri mopë Tosorintsi ora osigari Quirisito Ira tsipataigari. ⁵Carari te iraganinataiguëri Ira Tosorintsi. Iroro icamaguëtaiguë tojaisonori canta tenta ontimingani. ⁶Pinguengasëretaiquema oca, ora pigóontima ora icogui Tosorintsi. Quero picantaigari ibegaiga jorío jiraisonori: inebetaigaro ora te onganinate. ⁷Quero piquemisantiri ira ijitosorintsitasisatigueta. Ira jorío yamanocotaigabitacari itiomijani baaca, iriati oro. Isanguenatocotaiguëri:

Isobicaiguë matsiguenga, yapaiguë
aisati yógaigaca. Aique
yaratingaiganaque, imaticoben-
taiganaqueri baaca,
omaninquebintaiganaqueri.

⁸Querootisati acantaigari ibega iriro
cara intaguetagabaquero tsinane cagaro
iina. Aito canta icasitígataiguëri
Tosorintsi, yogamagaiguëri jorío,
icamaguë icarati 23,000 patiro
cataguiteri. ⁹Aisati iniaantaigacari Ira
Atingomi irogóontimari inguisaiguërica.
Aro Tosorintsi igátaiguëneri tojai
marangue itsigantaguetagacari aro
icamagarantaiguë tojai matsiguenga.
Querootisati acantari ibega iriro eiro;
quero aniaantari Tosorintsi. ¹⁰Aisati
yabentaigaca, irooti ipoguiriagarantai-
gacari ironomire Tosorintsi.
Querootisati acantari ibega jorío jirai.

¹¹Aro ocanca negaca jirai
isanguenaquero arota anguengasëreti-
maro ogóontimaro yamai. Aisati
omoncaraquima ora iquianca Tosorintsi
jirai. ¹²Aintaca paniro ijique: “Naro
sintsiri, naquemisantasantiro Irinibare
Atingomi”, aro nacantiri naro:
“Pigamema querota picantaguëti ora te
onganinate”. ¹³Ainiro aquengasëretai-
guero acantaguetiro ora te ongomeite,
aisa acantari ibega antagaisati
matsiguenga iquenguero icantaguetiro
ora cagaro caninatatsi. Carari Tosorintsi
caninari. Abenquimarica Iriro,
iromitococái cara quero acantaguetiro.
Quero yamatobitái, iromitocotasantacái
querota acantaguetiro ora
aquengabetaiga.

¹⁴Iroro, nanintaneegui,
nongomantëmi: quero piquemisantiri
pamanocotiri ibabane matsiguenga ira
yobetsiqui iriati. ¹⁵Nigóquimi obirojegui
ogóontatsiri. Iroro ora pinguemaguëto-
bëro ora nasanguenaquimi, ora
pigóontobëmaro pinguemisantobëro.

¹⁶Cara acarasiatocoqueri Tosorintsi oja
oba ora osigaro iraraa Jesoquisito
aisati óguëmaro, ¿Teco iroro
anguengasëretantimari Quirisito? ¿Teco
eiro iraisati? Aisati cara antiaquero pan
ora osigaro ibatsa Quirisito aisati
opaiguëro ¿Teco iroro anguengasëretan-
timari Iriro cara icamobicái?

¹⁷Tojaininta eiro, cara opaiguëro patiro
pan, omatsiguengatobaca eiroeguinta
iniaicái Tosorintsi paniro aquemisantai-
guërinta Quirisito paniro.

¹⁸Pinguengueri ira joríojegui. Cara
yóguineri Tosorintsi ira oisha aique
yaaguëri ibatsa, iquengasëretancari Ira
Tosorintsi. ¹⁹¿Pairo nacanti?

¿Aisonorico Tosorintsi yobetsiquëri ira
ijitosorintsitasitaguëta? Teni.

¿Caninarico ira ibatsa ira yaaguë ira te
inguemisantiri Tosorintsi? Tesonori
nangantiro negaca. ²⁰Ocari oca
nangantasantaiguëmi: iraugui te
inguemisantiri Tosorintsi, cara
yóguëneri ibabane ira ibira te imaiguëri
Tosorintsi, irianti camagari ipaiguë.

Cara yaaguëneri, irianti camagari
yaagobiti. Nocogasanti quero paaguiri
ibatsa irasi camagari, quero piquengasë
retiri. ²¹Aroca pinguengaiguëri
Atingomi cara póguimaro oja oba
osigaro iraraa, quero pógotari ora irasi
camagari aisati. Aroca popëro pan
popëgotëri Atingomi, quero papëgotiri
ira camagari aisati. ²²¿Aroco picogaigui
inguisaiguëmi Atingomi? ¿Obirojegui
sintsirisonori pabisirico Atingomi?

²³Ocantagani: “Caninataque
nanganquero pairoraca ora
inintacaquena Atingomi”. Carari aroca
nangantasitima pairoraca, quero
omitocotina. Quero nocogui
nacantabetaro ora te onguemisantaca-
guina Irinibare Tosorintsi. ²⁴Quero
piqueincotaiga ora picogaguëti aisati
obirojegui, iroonti pinguengaigui

omitocoqueri basini. ²⁵Cara ipimantagueta ibatsa, aro pomanantiri pijaguero. Quero posamitocobentiri: “¿Nega págueri? ¿Aroco yógueneri ibabane matsiguenga?” Quero pitsoroguiro aroca ipéri ibabane matsiguenga aroquenta yobetsiqueri Tosorintsi. ²⁶Ocanti Sanguenari:

Ora quibatsi iroonti irasi Atingomi, aisati irasi antagaisati ora inaguetsati quibatsiquè.

²⁷Aintaca ira te inguemisante cajemëmine irapajaquimi picoguica pijáque, aro pijáte. Pairoraca imëmi, aro popero. Quero posamitocobentiri ibatsa nega ipaniaca. Quero pijitiri quimingari. ²⁸⁻²⁹Carari aintaca poro inganquemi: “Icari ica ibatsa yógueneri ibabane matsiguenga”, aro pinguenquero ira comantimi. Aroca ijiti iraguëri ica ingantagueque ora te onganinate, quero paaguiri obiro. Quero picantaguetacaguiri ora te onganinate. Pigóti obiro quero yoguimingatimi ira ibatsa, carari te irogóte iriro. Pingábintseri.

Ainta ira cantatsi: “Inintacaguina Tosorintsi najaguëri pairiraca. ¿Pairo te iranintacagobitina ira tera irogóte?”

³⁰Aroca nangarasiatocoqueri Tosorintsi ibatsa aique najaguëri, ¿Pairo picantobiquina naro quero naaguiri cara ijitiri te inganinate ira te irogóte?”

³¹Aro nongomantëmi. Cara pijagaiguëri ibatsa; aisati cara pógaiguëma, pairoraca pingantaguetaiguë, pingantineri Tosorintsi arota iraniacani-nataguero Irro matsiguenga. Aique inganinabentaiguëmi Tosorintsi, aisati iraniaiguëmi ira te inguemisante, inganque: “Aisonori caninari Tosorintsi, caninasatinta itimaigui quemisantatsiri”.

³²Quero picantaguetacaguiri ora te onganinate ira jorío querootisati ira cagari jorío te inguemisante, querootisati quemisantatsiri ira

botoibiritari Tosorintsi. ³³Pingogaigue pingantina nibega naro. Pairoraca nanganque nomitocotiri basini matsiguenga. Te naro cantëgotachane naati; nacantocotaiguëri matsiguenga-jegui arota inguemisantaiguero Tosorintsi, arota iragabisaicotaiguero.

11 ¹Aisati pingantaiguema nibega naro, aisa nacantari ibega Quirisito.

Ora onganque tsinane quemisantatsiri.

²Nacaninabentaiguimi cara piquengaiguina aisati piquengaiguero omagaro ora nogometaiguëmi jirai.

³Yamai nogótacagaiguëmi cara Quirisito igáqueri antagaisati sërari; aisati igáquero tsinane sërari; aisati igáqueri Ira Quirisito Tosorintsi. ⁴Cara iromanocoqueri

Tosorintsi sërari, aisati cara ingomantanquero Irinibare Tosorintsi, quero ibasiguitota iguitoquë. Aroca imasiguitoquima iroonti pasiguitagantsi.

Inganquimaro pibega tsinane. ⁵Carari cara omanaque tsinane, aisati cara ongomantanquero Irinibare Tosorintsi, caninataque omasiguitotima oguitoquë. Queroca obasiguitota, iroonti pasiguitagantsi. Aisatime onganquima opeitimame antagaisati oguisi, teni

ontingomintimari ojime. ⁶Queroca oninti obasiguitota tsinane, aro caninataque opeitirota oguisi. Queroca ocaninati papeita, aro omasiguitotima përosati.

⁷Teni ongomeite cara imasiguitotima sërari cara yamani aroquenta yosiacari Tosorintsi Ira obetsicanëri jirasonori. Tosorintsi agátiri sërari iriro itingomi antagaisati inanënguitsi quibatsiquë. Aisati iriro otingomi tsinane, igátiro.

⁸Yoguibatëri sërari cara yobetsiquëri Tosorintsi. Aique yáguë imeriqui sërari ora yobetsiquë ora tsinane. ⁹Te irobetsiquiri sërari así tsinane; carari Tosorintsi yobetsiquëneri tsinane irasi sërari.

¹⁰Iroro ora caninataque omasiguito-tima tsinane arota irogóontaiquemaro ironomire Tosorintsi cara otingomincari ojime. ¹¹Pinetsaigue, te ontimasitima tsinane, teatisati intimasitima sërari. Ininti Atingomi ágobagaiguema.

¹²Jiraisonori Tosorintsi yobetsiquëro tsinane iroonti imeriqui sërari. Yamai ipaniaca sërari cara tsinanequë. Carari ira matsiguengajegui ipaniaca Tosorintsiquë. ¹³Pigóontaiquema. ¿Pairo piquengaiga obiro? Aroca omanocoqueri Tosorintsi tsinane, ¿Caninataqueco omasirijaguitotima?

¹⁴Te ometaiguema eiro ira sërari ingaguisite. Aro opasiquique aitinta oquibiansa aguisi. ¹⁵Carari aniacaninataiguëro tsinane cara ongaguisiteca oguisi. Iroro omasiguitoontima.

¹⁶Aintaca cogatsi iripëgatsatina, nogótacaqueri cara nameta nara oca nocomantëmica, aisati yametaigaro omagaro ira quemisantiri Tosorintsi.

Yogometocoquero Paboro cara yapapinintobitaiguëri Jesus.

(Mt. 26.26-29; Mr. 14.22-25; Jr. 22.14-20)

¹⁷Yamai aiti basini nongomantëmi. Teni naniacaninataiguemi cara papatoica papabiritaiguëri Jesus. Te onganinate, te omitocotaiguëmi.

¹⁸Natsita comantëmine oca. Icomantapëna cara papatobiricari Atingomi, teni pinguengaiguema, pipëgatsatobaca. Najitobëro aisonori arosata. ¹⁹Cara pipëgatsatobaga, iroso pigóontaiquëmari ira quemisantansatatsi aisonori. ²⁰Cara papatoica, papabiritaiguiri Atingomi, tesonori pinguengaiguëri Iriroro. ²¹Cara papaigui, ainta yáganontaigaca iraperi iraisati, te irapajaguiri basini. Te popaagagoba-guima aintanta ira tasiaquenguitsi, aintasati ira singuiquenguicha. ²²¿Pairo picantaigui? ¿Teco ine pobangojegu

cara popaigue aisa pisinguitaiguema? Ainta pomainti popiguemisantane, pipasiquitacaqueri ira te ine iraperi. ¿Pairo nangantaiguëmi? ¿Aroco naniacaninataiguëmi? Quero.

²³⁻²⁵Aroquenta yogomequina Atingomi ora nogaquemira cani. Jirai, tsitiniriquë, yáguëro pan Atingomi Jesus. Aro icanqueri Iriri: “Pabati, nacarasiaquemiro oca pan, aronega”. Aique itiaguequero yotsatengaigacaro. Icanëri irogomere: “Jeroca pan ora osigaroro nobatsa. Cara popapinintaiguëro pinguengaiguena Naro camobiquimine”. Aro yapaiguëro. Aitosati yáguëro irógomento. Icantaiaguëri irogomere: “Jeroca oja oba ora osigaroro naraa. Cara pógapinintaiguëmaro, pinguengaiguena, pigóigue pisotoatobitaiguëmi naraa pabisaicoontëmaro. Cara nangamobitaiguëmi, aro pigóiguë quero namatobitaiguëmi. Nanganquimiro antagaisati ora nocomantaiguëmi. Aisati iromoncaraquimiro Irinibare Pabati”. Irooti tsitiniri cara yágagantëquero Jesus. ²⁶Cara popapinintaiguëro oca pan aisati cara pógapinintaiguëmaro oca oja, aro pingomantaiguëri basini matsiguenga icamobicái Atingomi. Përosati pingantaiguero negaca irooti cara iribocapae Jesus. ²⁷Aintaca poro irapëro pan, iróquimaroca oja oba cara icantagueti te onganinate, icantasicaro. Te iromitocotiri matsiguenga iraniacani-natiri Ira Quirisito. ²⁸Obitsita ogótocoquenguichane obiati ainiroca picantaguetomotiri Atingomi ora te onganinate. Queroca pini, aro popëro pan, aisa pógüëmaro oja. ²⁹Te onganinate opëro pan eiro, teatisati óguimaro oja oba queroca aquengasëretaro ora ocanti pan aisa ocanti oja. Angantasiquimaroca ingasitígatacái Tosorintsi.

³⁰Iroro ora ainta obiroquë ira janaitatsi aisa ira te irisintsite. Aisati ainta camaguequenguitsi. ³¹Aroca

ongomantëgotima eati aitica antaguete te onganinate, quero icasitígatái Tosorintsi. ³²Cara ingasitígatacái Atingomi, icoguini iraganinatái iragatingatái arota eiro quero iáti Sharincabeniquë. Te iraninte Tosorintsi antsibatimari ira tsoengatsiri. ³³Yamai, nopiguemisantacagane, nangantasan-timi aroca popatoitimaca cara popapinintobitaigueri Atingomi, piguiaque irooti cara iraretaiguëma antagaisati. ³⁴Iritasegueca poro, irapeta irasiquë ibango cara queroquerai ipoqui arota quero icasitígatimi Tosorintsi cara papatoica. Aiti basini nocoguini nongomantëmi, carari cara narequimi nogometaiguëmiro.

Ora opaguetaái Isère Tosorintsi.

(Irom. 12)

12 ¹Yamai, nopiguemisantacagane, nocogui pigótocoquero ora opaguetaiguimi Isère Tosorintsi panirópague obiro. ²Pigóiguë jirai teraiquerai pinguemisantiri Atingomi, ainta piquemisantasitabeta ora pobetsicaiguë obiati. Pijitosorintsitasi-tari carari te irinibatimi, irianti mosonti. ³Nocoguini pigóigue oca. Aroca poro cantënguistsine “Teni inganinate Jesus”, teni onibataguiri Isère Tosorintsi. Aisati te paniro inganque: “Jesus Irianti Atingomisonori”, teca onibataguiri Isère Tosorintsi. ⁴Pinasitagueca ora opaguetacái Isère Tosorintsi carari irooti Isère. Irooti paniro. ⁵Pinasitagueca cara omitocoqueri eiro Atingomi carari paniro ini. ⁶Pinasitagueca ora ipaguetacái Tosorintsi. Icantacacái omagaro acanti, carari paniro ini Iriro. ⁷Panirrootipague pogometaiganacái Isère arota omitocotobaguetanëma. ⁸Ora Isère ogótacaqueri paniro cara ingomantasantaguete catingsati ora

iquianca Tosorintsi; ira basini pogometacaqueri caninasati ora igótagueque. Opagueteri pitirrooti Isère Tosorintsi. ⁹Opëri basini sërari inguengasëretantimari Tosorintsi igóque ora icogui ingantaguete Tosorintsi. Ira basini opëri iragaguibegagueteri janaitaguetsiri. ¹⁰Opëri Isère Tosorintsi ira basini sërari iritosongantë; opëri basini ingomantantaguete ora yoniaguëri Tosorintsi. Pigótacaqueri basinipague cara igótaguëtoberri comantantatsiri aroca iquenguistsatacaguiri camagari, teca onibataguiri Isère Tosorintsi. Opëri basini onibataaqueri basiniati nibarintsi. Poniaguëri basini cara iragabiséro inibati basiniati.

¹¹Antagaisati ocapague pinasitagueca opaguetaiguëri quemisantatsiri Isère Tosorintsi Ironta irooti paniro. Pairoraca onintaguete, opaguetaiguëri panirrootipague quemisantatsiri.

¹²Pinetse: pigóiguë patiro pini obatsa eiro, carari aitosati aiti aguiti, obaco, oroqui, aguemita, aneingomento, omagaro. Tojai inatsi, carari patiro pini obatsa. Aisati acantari ibega Quirisito; paniro ini, carari tojai eiro quemisanqueri. ¹³Paniro pini Isère Tosorintsi. Pitasongobentái, iroro omatsiguengatobaganaa, eiro paniro aisati acantari ibega Quirisito paniro, Ira obaotisabiritaigaca. Acarataigui jorío, ira cagari jorío, ibimantaga, aisati ira te imimantima. Pinancái paniro Isère Tosorintsi, coshoni pogaigacái. ¹⁴Patiro pini obatsa, carari aiti ágantaro, aniaantaro, aquemantaro, anëitantaro, antagaisati. Tojai pini, carari patiro pini obatsa. ¹⁵Aroca onganque aguiti: “Tenta naro ibaco, te naro ibatsa iriro”, ¿Teco ora aguiti obatsa aisati, te inasitanëma? ¹⁶Aroca onganque aguemita: “Tenta naro iroqui, te naro ibatsa iriro”, ¿Teco ora aguemita obatsa aisati, te

inasitanëma? ¹⁷Arome antagaisati obatsa iroonti oroqui ¿Ati ongantimame anguemantimaro? Arome antagaisati obatsa iroonti aguemita ¿Ati ongantimame anguemijengatantimaro? ¹⁸Carari te irobetsicái Tosorintsi negaca: yobetsicáiro obatsa caninasati. Ipáairo aquemantaro, aniaantaro, anëitantaro, omagaro. Pairoraca icoque, icantaguequero negaca. ¹⁹Arome iroonti aneingomento, ¿Negarame inë basini obatsa? ¿Ati ongantimame? ²⁰Patiro pini obatsa, carari aiti tojaipague obaco, aguiti, oroqui, aguemita, aguetsi, aneingomento, omagaro. ²¹Teni cara ongantima oroqui onganquero obaco: “Teni nanintimi”. Teatisati aguito onganquero aguiti: “Teni nanintimi”.

²²Aisonori, aitiro obatsaquë pairorapagueraca ora te osintsite, carari anintasantiro. Aguibatiro. ²³Aisa ocanta, aiti ora ipasiquitocoti, carari caninataque pini. Caninasati omasiquero ora te onogue ongonijate. ²⁴Te omasitiro ora te opasiquitocotiro. Carari caninasati yobetsiquëro obatsa Tosorintsi. Caninataque pini orapague te aniacaninatëgotiro. ²⁵Te onganinate cara onguisabacaguima obatsa. Icoquini Tosorintsi ongábintsabacaguima obaco, aguiti, anei, antagaisati. ²⁶Aroca ongatsitë poro, aisati otsipiriaquero omagaro obatsaquë. Teca ongatsite, onganinatë antagaisati obatsa.

²⁷Obirojegui botoibiritari Quirisito aisati picantaro ora ibatsa Quirisito. Panirootipague obirojegui picantaro iguiti, ibaco, iroqui, iguemita, omagaro. ²⁸Aro acarataigui tojai quemisantaiguiri Tosorintsi. Yoguibatëri iragátane. Igáqueri inguenguitsatagueque Nibarintsi Caninaro. Aisati igáqueri comantantatsiri ingomantanque. Aisati igáqueri ogameantatsiri irogomeantë. Aique igátaguequeri basinipague. Ainta

itasongantaguëti; basini yogaguibegajiri janaitagueatsiri; basini omitocoontatsi; basini irianti itingomi, igátaguequeri quemisantatsiri ora ingantagueque; basini inibatasitague taro basiniati nibarintsi. ²⁹¿Aintaco antagaisati eiro quemisantatsiri iragátane Quirisito? Teni. ¿Aintaco omagaro eiro comantantatsiri? ¿Aintaco antagaisati ogameantatsiri? ¿Itasongantaguetico omagaro? ³⁰¿Yogaguibegajirico janaitatsiri omagaro? ¿Inibatague tiroco antagaisati basiniati nibarintsi? ¿Iquemobërico antagaisati icomantague-tiri irapiguemisantacagane ora inibatague ti basiniati? Tesonori. ³¹Carari caninataque pingogasantague imaguetaiguëmi Tosorintsi cara pintineri caninasati ora icoicotague timi. Yamai nogometaguëmi ora pingantasantineri caninarisonori.

Caninataque anintobaguima.

13 ¹Aroca nanibatasitima basinipague nibarintsi aisa aroca nanibatasitima irinibare ironomire Tosorintsi carari te nanintiri basinipague, naanti catsiguetsari. Nacancaro pibega catsiguero campana ocantasita, teeng, teeng, teeng, teeng. Aisati nacancaro pibega tamera ocantasita tong, tong, tong, tong. ²Aroca nogóquero ora inganque Tosorintsi teraiquerai inanënguitsine, aroca nongomantagueantiro matsiguëngaquë, aroca nogótaguequero ora terai ironijagantiro Torosintsi, aroca nogótasantëro antagaisati, aroca nanguemisantasanotëri Tosorintsi arota nagátiro oguitoja: “Ogaganëma”, aro ogaganëma, carari teca nanintaiguëri basinipague matsiguënga, teni nongomeite. ³Aroca nomasitague timari antagaisati ora nasinta ira basinipague matsiguënga, aisati aroca nantineri

Tosorintsi nocomantëgotëri, iroro inguisaneintaguëquinaca matsiguenga arota iritaguëna nangamobitaigueri, teca nanintaigueri matsiguenga, te omitocotina omagaro ora natsipiriaque.

⁴Aroca anintaiguëri basinipague matsiguenga, quero aguisiri omanapague; iroonti angábintsaiguëri; quero aguisabiritiri, quero oguibata eati. ⁵Aroca anintaiguëri matsiguenga, quero acanti te onganinate, otabitobëri basini caninasati. Quero omichati queronta anti ora ocogasanti; quero aguisaneintaguëtiri basini; quero aqueincotiri basini ora te onganinate. ⁶Quero acaninatëgotiri ora icanque basini te onganinate. Anganinatëgotiri ira cantiro ora caninaro, ora catingaró, ora aisonori. ⁷Atsipiriaque antsinisati; quero ipëgatari. Ajitocoqueri basini ora caninaro. Aguiakeri Tosorintsi agabiacaírone ora te onganinate. Pairoraca inanënguistsine, përosati anganque caninasati.

⁸Quero ocomantanti përosati; quero inibatasitaro basiniati nibarintsi përosati; quero përosati igótabetaro pairoraca; carari përosati anintobaganëma. ⁹Yamai teni ogótasantaigue; igótabeca, teatisati ongomantantaigue, ¹⁰carari cara orequima ora caninarisonori, quero ocogajiro oca caninataguetabetacha yamai. ¹¹Cara eiro janequiqueraí, aisa acantari janequi cara inibatasita, igótasitabeca arosata, aquengasitabeca arosata. ¹²Carari cara iquibianë ojocanëro cara acantari janequi. Aisa ocanta yamai aniaantari Tosorintsi coboriariquë, carari te ingonijatasante. Aiquenta aniasantapëri Jonogaguitequë. Yamai igótabecari eiro Tosorintsi arosata, aiquenta ogósanotapëri aisa ocanta igósanotacái yamai Iríro. ¹³Yamai përosati aquemisantaigakeri Tosorintsi, igóiguë quero

yamatobitái, aisati anintobaca përosati. Aiti maba caninari, carari caninatasantaque cara anintobaca.

Ira nibatatsi basiniati nibarintsi, aisati ira comantatsi.

14 ¹Pingogasante pinintaigueri basini matsiguenga. Aisati pingogasantiro omaguetaiguemi Isëre Tosorintsi cara pintineri Atingomi. Caninataque pingogaigue omemi cara pingomantaguëtiri matsiguenga Irinibare Tosorintsi. ²Ainta irapague nibatatsi basiniati nibarintsi. Teni iromitocotiri irapiguemisantane queronta iquemaigabaqueri matsiguenga. Quero poro quemirine. Iríanti Tosorintsi yamanabeca, Iríronta nibatacaqueri Isëre Tosorintsi. ³Carari ira comantaguëtiri imatsiguenga Irinibare Tosorintsi inguemisantacagai-ganaqueri, iromitocotaiguëri, aisati iraganinataiguëri. ⁴Ira nibatatsi basiniati nibarintsi imitococa irineni. Ira ogomeantiro Irinibare Tosorintsi, imitocotaiguëri omagaro quemisantsiri. ⁵Nocoguini pinibataigue basiniati nibarintsi, carari nocogasanti pingomantantiro Irinibare Tosorintsi. Tojai icanque comantantatsiri: igótacaqueri irapiguemisantane. Aintaca abisërone irinibare ira nibatasitacha, aisati ocaninati. Irogótacaqueri quemisantsiri cara inguemaigabaquero.

⁶Yamai, nopiguemisantacagane, aroca najáque cara obirojeguiquë, nanibatasitapëmaro basiniati nibarintsi ¿Querocóniátasita? ¿Ati ongantima nomitocotaiguëmi queroca noniagaiguimiro ora yoniaguëna Tosorintsi, queroca nigótacagaiguimiro Irinibare, queroca nocomantaiguimiro iguenguitsare Jesoquirisito, queroca nogometimi ora terai pigóiguero irasi Quirisito? ⁷Aisati

teni onganiate cobërentsi, soncari, cagaronta matsiguenga. Aroca amasiquima teni ogóte pairoraca ocanti.

⁸Aisati teca intibote caninasati soraro ¿Pairi ogóquenguitsine irobetsiquëma cara iromanáque? ⁹Aisati picantaiga obirojegui. Aroca pinibatantimaro pininequë ora te inguemaigabaquero basini, ¿Ati ingantima inguemaiguëro ora pingantabequima? Pinibatasita.

¹⁰Yaca quibatsica aiti tojai nibarintsipague. Pinasitaguëtanaca. Patiropague caninaro irasi ira quemobërone.

¹¹Carari teca anguemaigabaquero irinibare basiniati matsiguenga, te omatsiguengatimari, aisati te iromatsiguengatái queronta aquemiri.

¹²Iroronta picogaigui omaguetaiguëmi Isëre Tosorintsi ongantacaquemiro, yamai aisati pingogaigue omaiguëmi cara pomitocotaiguëri popiguëmisantane inguëmisantasantanë. ¹³Iro ora aroca pinibatabitaro nibarintsi ora te irogótiro basini, caninataque pomaniri Tosorintsi imemi cara poniagaiguëri quemisantatsiri ora pinibati. Aique inguemobëmi omagaro. ¹⁴Aroca nomanocoqueri Tosorintsi nibarintsiquë ora te ogótengani, nomanaqueri nasërequë, carari teni nogóte naati ora ninibati. ¹⁵¿Pairo nanganque? Aroca nomanaqueri Tosorintsi nibarintsiquë ora te ogótengani, nomanaqueri nasërequë. Aisati caninataque nogóte ora nomanaqueri. Nangántabenqueri Tosorintsi nasërequë, aisati caninataque nangántabentiri ora naquemaque.

¹⁶Aroca pomane obiro pisërequë, pinganque: “Caninarisonori Tosorintsi”, ¿Ati ingantima inguemaigabaquero pitsipa ira te irogótiro? Quero yamanacaguimi queronta iquemimi.

¹⁷Caninasati picarasiatiri Tosorintsi, carari te omitocotiri basini.

¹⁸Nacarasiaqueri Tosorintsi,

ninibatasantiro basiniati nibarintsi, nobataiguëmi. ¹⁹Carari cara apatoibiritari Atingomi, nocogasanti nanibate arosata catingasati arota nogometaguëri quemisantatsiri. Te onganinate aroca tojai nanibatasantë nibarintsiquë ora te irogóiguëro quemisantatsiri. ²⁰Nopiguëmisantacagane, quero piquengaiga cantaca janequi, pinguengasantaguëma cantaca antiasipari ogótatsiri. Carari quero piquengairo ora te onganinate, queroca picantiro ora quimingaro. Caninataque pingantaiguëmari janequi cara te irogótiro ora cagaro caninatatsi.

²¹Ocanti Sanguenari:

Icanque Atingomi: “Nanibataiguëri jorfojegui nibarintsipaguequë.

Aisati nagátaiguëri matsiguenga cagari jorfo irinibataigapëri basiniati nibarintsi, carari quero iquemaigabaquero jorfo, querootisati iquemisantina Naro”.

²²Iro ora cara pinibataiguëroca basiniati nibarintsi, irointi ora irogóontëmaro ira terai inguëmisante cara yogomequimi Tosorintsi. Carari cara pingomantantaiguëroca, pomitocotaiguëri quemisantatsiri.

²³Pinetsaigue: cara popatobiritaiguë mari Atingomi, aisati omagaro nibatatsi basiniatiquë nibarintsi, aroca ingaigapë irægüi te inguëmisante, ¿Queroco icantocotaiguëmi: “Te iraneicotaiguëma irorojegui. Ichabënitaguëni”? ²⁴Carari aroca antagaisati pingomantagueantë, aisati ingapë poro ira te inguëmisante, cara inguemaigapëmi aro oshabitapëri iraneingomento cara irogóque ainta ora icantaguetomotiri Tosorintsi te onganinate. Irajique omagaro comantëgotëri iriati. ²⁵Aro ingomantë gotëri ora imánabeca isërequë. Aro iroboticagueritotasipëmari Tosorintsi, irajiqueru Itingomi. Aisati

ingantaiguëmi: “Aisonori itsibataiguëmi Tosorintsi”.

²⁶¿Pairo nanganque, nopiguemisantacagane? Cara popatoitima, caninataque poro cántatocoquerine Tosorintsi Iriro caninari, irogomeantë basini, ainta ingomantanque basini, basini nibaquerone basinati nibarintsi quero igóigui ira tsipataigari, aisati ainta ironijagaiguëmiro ora icanti. Pairoraca pingantaiguë, pingantineri Tosorintsi aisati pingogaigue pomitocotaigueri quemisantatsiri. ²⁷Ainta nibaquerone nibarintsi ora te pinguemaiguero, aro irinibaque paniro, irinibaque basini, irooti maba. Quero basini. Patiro irinibatagueque paniropague. Caninataque poro oniagaiguëmirone ora ocanti nibarintsi. ²⁸Queroca ini ira oniagantirone, quero inibati basinati nibarintsi; iromaireteta catingsatiquë irapiguemisantane. Patiro irinibatiro casiriconiati, irinibaquerinta Tosorintsi. ²⁹Caninataque paniropague ingomantante Irinibare Tosorintsi pite, queroca maba. Iraegui basini inguengasëretaigabaquero ora icomantaiguë. ³⁰Irootita icomantanti poro, aroca Isère Tosorintsi oniaguëri ogameantagantsi ira basini, aro iracotanë. Aique ira nibasigatsi iritsita tsonguërone irinibare. ³¹Paniropague ingomantagueantë antagaisati arota irogometaiqueri omagaro quemisantsiri, iraganinasëretaigueri aisati. ³²Ira comantantiro Irinibare Tosorintsi iromairete cara Isère Tosorintsi ongomantaqueri basini. ³³Te iraninte Tosorintsi angatsigueguitetaigue cara omanocotiri. IcoGUI omairetaigue, caninasati anganque poropague arota anguemasantobëri.

Yametaiga icantaigui negaca antagaisati quemisantatsiri ira botoibiritari Atingomi. ³⁴Aisati

ametaiga eiro, ora tsinanejegui omairetaiguë tenta iranintacaguero onibate cara yapatotaiga. Caninataque onguemisanque cara ocanti Sanguenari. ³⁵Ocoguica ogóte tsinane pairoraca, caninataque osamitëri ojime cara obangoquë. Teni onganinate onibataigue tsinanejegui cara papatobiritaigari Atingomi. ³⁶Pinetse. ¿Pijitaiguico opaniaca Irinibare Tosorintsi cara obiojeguiquë? ¿Pijiqueco paniro pigóiguiro obiojegui? ³⁷Aintaca comantantasiri ijica Iroro nibataqueri Isère Tosorintsi, nocoguini irogótiro oca: oca nasanguenataiguëmica, iroonti iragáantane Atingomi. ³⁸Queroca poro quemisantiro oca, querootisati piquemisantiri iriro. ³⁹Yamai, nopiguemisantacagane, pingogasantague pingomantantiro Irinibare Tosorintsi. Aisati pinintacaguiri popiguemisantane irinibataiguero basini nibarintsi. ⁴⁰Carari, caninasati pingantaiguero antagaisati, paniropague pingantiro.

Paboro icomantëgotëri Jesos icabiritanaca icaniantanai. Aisati cara angabiritanaima eiro.

15 ¹Yamai, nopiguemisantacagane, nocoguini nogótacagaiguëmiro Caninaro Niabrntsi ora nocomantai-guëmi jirai. Irooti piquemisantaigaba-quero aisati përosati piquemisantanëro yamai. ²Irooti pabisaicoontaca yamai, aro përosati piquemisantantaigasegui. Carari piquemisantomemegacaroca, quero yogabisaicotajimi Tosorintsi. ³Noguibatë nocomantëmiro ora yoniaguëna Tosorintsi: ainta acantaguetomotiri ora te onganinate, iroro ora icamobitaguëcái Quirisoito. Imoncaraquero ora ocanti Sanguenari. ⁴Aisati yomianquengani igamaga

omoroquë. Pabisanaque maba cataguiteri, aro icabiritanaa yoganiatairi Iriri cara ocanti Sanguenari. ⁵Aique yoniagaari ira Sejas, aique yoniagaigaari aisati antagaisati irogomere ira caratatsi 12. ⁶Aique yoniagaigaari tojai quemisantatsiri icarati 500. Iniaigabajiri. Ainiroquerai yamai itimaigui irirojegui, carari arosataanti camënguïsi. ⁷Aique yoniagaari Santiago, aique yoniagaigaari omagaro iragátane. ⁸Aique naró carantënguïsi. Yoniagapëna naró, nacantari ibega ira ibogatsi queroquerai imoncarata 9 manchacori. ⁹Igáquena, carari te nangantimari ibega basini iragátane, tenta nongomeite naró. Noguitague-queri ira quemisantatsirijegui, naguisabitacari, nocogabeca nóguirime omagaro. ¹⁰Icábintsasantëna naró Tosorintsi icantaneintëgotëna, irooti nareantaca yamai. Te ingábintsasantasitina. Ipomirintsibencari Tosirintsi basini iragátane, carari nopomirintsitasantobencari naró. Te nangantasitimaró naró, icábintsasantëna, imitocoquina, iroro nacantasantagüequineri. ¹¹Jemita pairi comantaiguëmi, naró, iriroco basini iragátane, caninataque piquemisanque. Nacantaigari ibega iriro, nocomantaiguë miro Irinibare Tosorintsi irooti ora piquemisantaigabaquera.

¹²Pinetse. Naquemocoqueri aintapague obiroyeguiquë ira cantasitacha quero icabiritaja igamaga. Cani jirai nocomantëgotaiquëri Quirisito naroeGUI iragátane aisati comantantsiri cara icabiritanaa Quirisito icaniatanai. Piquemisantaigabaquena. Yamai, ¿Pairo picantobiti quero icabiritaja camaguetatsiri? ¹³Querome icabiritaja camaguetatsiri, querootisati icabiritaja Quirisito. ¹⁴Querome icabiritaja Quirisito, natsipiriasicarome

nocomantëgotëri aisati pitsipiriasicarome piquemisantaiguëri. ¹⁵Pigóiguëme cara nontsoiguëgotasitimarime Tosorintsi naroeGUI iragátane. ¿Teco nongomantëgotiri: “Icabiriqueri Quirisito”? Carari querome icabiritaja camaguetatsiri, querootisati icabiritiri Tosorintsi Iriro. ¹⁶Querome icaniatanai camaguetatsiri, querootisati icaniatanai Quirisito. ¹⁷Aisati querome icabiritaja Iriro, piquemisantaigabitari, përosatime pingantagueti ora te onganinate. ¹⁸Aisati antagaisati quemisantatsiri ira camënguïsi, játaqueme Sharincabeni-quë. ¹⁹Aisati, querome acabiritaja, atsipiriasiquimarome cara aquemisantaigabitari Quirisito yamai, ogasëretasantaca abisanaqueri basini ira atsipiriaigatsi.

²⁰Carari aisonori icabiritasantaa Quirisito, icaniatasantanai, ibataiguëri omagaro basini camaguetatsiri carari inganiataigae aiquenta. ²¹Aroquenta canquero Arán jiraisonori ora te onganinate, iroro acamasanoigaguëti yamai. Carari ainta Ira jitacha Quirisito, icantagueti ora caninaro, irooti angabiriantanaima eiroegui.

²²Omatsiguengatacari Arán, iroro acamaantaguëtaiga. Aisa ocanta antagaisati eiro omatsiguengatacari Quirisito, anganiatanae eironta iraisati, ingabiritajái. ²³Ibataigacái Quirisito. Aiquenta, cara iribocapae intinaigari antagaisati quemisantatsiri. Cara omoncaraquema, angabiritajima omagaro eiro, anganiatanae. ²⁴Aique Quirisito agabeirine antagaisati agátabetachari, obatabetachari, itingomipague, omagaro iritsongaigapëri. Aroinganqueri Tosorintsi: “Pabati, yamai nagobiaqueri antagaisati. Pigátaigueri përosati omagaro inagatsi Obironta Itingomisonoriguinte”.

²⁵Irobatacagantanë Quirisito irooti cara

iragabiauèri iritsongaiguèri omagaro ira quisaihabitari. ²⁶Aique quero icamaji matsiguenga aisati. ²⁷Ocanti Sanguenari:

Ipèri Itomi Tosorintsi iragáantai-guèri antagaisati inagatsi. Paniro te iragátiri Iriri, Ira pèri Quirisito antagaisati.

²⁸Cara iragabiauèri Quirisito iraequi pègacari, aique inganqueri Iriri: “Jerica, Pabati. Popabaquina cara nagobiaqueri omagaro icaegui. Yamai nocoguini intingomintaiguemita antagaisati. Aisati Obiro nasi Natingomi”. Aique Iriri Tosorintsonori, Itingomisonoriguinte.

²⁹Pinetse. Ainta obirojeguiquè ira baotisabiricari ira camènguisti. Querome icabiritaiganaja camaguetatsiri, ¿Pairo icantobitiro? ¿Teco iratsipiriasitima? ³⁰Aisati querome nacabiritaja naroequi iragátane Quirisito, ¿Pairo nocomantè cobiriqueri? ¿Teco natsipiriasitima? ³¹Piquemisantaiguèri Atingomi Jesoquisito. Iro ro ora nacaninasèretè gobiritaiguèmi. Aisa ocanta, aisonori nocomantasantaiguèmi oca: teni nogóte atiraca ongantima iróquina iraequi quisaneinquina cara nocomantanti. Antagaisati cataguiteri icogabeca irógaiguename. ³²Canta Ejesoquè iguisaneintasantaiguèna catsimari matsiguenga, tojai yobomirintsitaiguèna. Aisa icantaigari ibega secari atsigantatsiri ira nipègataca. Querotame nacabiritanaca ¿Pairome omitocoquinane? “Caninataqueme intsome opaiganaque, aisa ógaiganaquima. Coraque angamaiguè naramani”. Aro angaraque. ³³Pigamaiguemari ira nibatasitacha cantacha nega. Iromatobiquemi. Cara ocantagani: “Quero pitsibatari ira cantiro quimingari arota quero ijocacaguimiro ora picantabeta caninari”. ³⁴Pingaguite,

pinguengasèretima. Quero pogatsitairo ora te onganinate. Ainta obirojeguiquè ira te irogótiri Tosorintsi. Nacanquemiro negaca arota popasiquitaigue.

³⁵Ainta ira osamitènguistsine: “¿Ati ingantajima cara ingabiritaigaima camaguetatsi? ¿Ati ongantajima ibatsa aroca inganiatae?” ³⁶iQuero posamitasita! Pinetsaigue: cara pomanguitiro oguitso, quero pii panguirintsi querooca ocami oguitso.

³⁷Cara ianè, iroonti basiniati. Cagaro cantaro oguitso ora popanguitè. Popanguitèro tirigoguitso iroonti oguitso. Pinanè obatsa, opoa, osi, omagaro. Yamai iroonti basiniati. ³⁸Popanguitèro. Aro imaguetèro Tosorintsi antagaisati oguitsopague asiati obatsa, opoa, osi, omagaropague basiniati. Ipaguetaguèro ora icogui Iriri. ³⁹Teni aisa ongantobaguima ora ibatsapague. Basini pini ibatsa matsiguenga. Basiniati ibatsa basiniripague. Casiriconiati pini ibatsa tsimiripague aisati simapague. Antagaisatipague basiniatipague.

⁴⁰Ainta ibatsa paniacha yaca quibatsica. Aintasati ira paniacha Jonogaguitequè. Ocaninataigui omagaro, carari te aisa ongantobaguima. Pinasitanaca propague. ⁴¹Ora irobariane paba teni aisa ongantimaro iguètaguiterite manchacori. Ora irasi jonogusatipague iroonti basiniati. Inasitaguëtanaca. Aintapague obariasantatsi, irari basini, te.

⁴²Aisa acanta eiro, cara angabirita-jima. Quero aisa acantaja ibega yamaica. Iritijècái, aro obatsaganè obatsa. Angabiritaiganajima; quero ibatsaganai aisati. ⁴³Teni ongomeite oca iritijètabecáica, carari onganinatasantè ora cabirienguichane. Yamai teni asintsite, angabirita-jima sintsirisonori. ⁴⁴Oca obatsaca iritijècái, ora amecaro

quibatsi atimantaigaro. Cara angabirita-jima, inasitanaima obatsa, omeantimaro antimaque cara Jonogaguítequë. Aitiro obatsa yaca quibatsica; aiquenta inanë basiniati antimantimaro Jonogaguíte.

⁴⁵Ocanti Sanguenari:

Caniatatsiri inabita sërari
obaquenguísi, ira jitacha Arán.

Carari aique ipoque Quirisito carantënguísi, Ira caniatacagantatsiri aitinta Isère timagantatsiri. ⁴⁶Yamai obaque obatsa ora atimanta yaca quibatsica. Aiquenta antimantapëmaro basiniati obatsa ora omeantëma Jonogaguítequë. ⁴⁷Ipaniaca quibatsiquë ira obaquenguísi jitacha Arán.

Yobetsiquëro ibatsa iroonti quibatsi. Carari Quirisito ipaniaca Jonogaguítequë Ira carantënguísi. ⁴⁸Itimaque Arán yaca quibatsica. Aiti ibatsa, aisa icantaigari antagaisati matsiguenga timaigatsi quibatsiquë. Aiti ibatsasonori Quirisito Jonogaguítequë, aisa angantaiguëma eiro jätënguítisine Iriroquë. ⁴⁹Yaca asi obatsa osigaro irasi Arán. Aiquenta osiaquemaro irasi Ira panënguicha Jonogaguítequë.

⁵⁰Iroero, nopiguemisantacagane, nongomantaiguëmiro oca: quero piáti oca obatsaca canta igáanti Tosorintsi, querootisati piáti ora obatsaga: canta, quero pinai ora patsaagantsi. ⁵¹Yamai, noniaguiguëmi ora te irogóiguero matsiguenga jirai: quero acami antagaisati, carari omagaro eiro omasiniatitanae. ⁵²Intibotanë, aro ogóiguë omoncaraca antagaisati. Intibotanë, irooti angabiriantëma eiro, camabetacha, quemisantatsiri, quero acamaji aisati. Aisati eiro terai angame omasiniatitanae. Inganquero Tosorintsi omanapaguesonori. ⁵³Yamai asiati obatsa obatsaganë; carari aiquenta quero ibatsagaji aisati. Yamai acamaque, carari aiquenta quero

acamaji aisati. ⁵⁴Cara omasiniatitanae irooti cara quero ibatsagaji, querootisati acamaji, aique omoncaraquema ora ocanti Sanguenari:

⁵⁵Aro. Yamai ocarati cara angamaque agabeironta camagantsi. Quero ogatsitaa acamaji. Quero aquengasëretaa acamaji. ¡Caninataque! Yamai quero otsorogaigai acamaji.

⁵⁶Cara angantaguetiro ora te onganinate, aro ontsorogaiguëro angame, cara ocanti Sanguenari, aroca angantagueque ora te ongomeite, angamaque. ⁵⁷Carari aroque icamobicái Atingomi Jesoquirisito, icabiritaja, yogabisaicotajái. Aro intsome angantocotiri: “Caninarisonori ini Tosorintsi, intsome angarasiatiri”. ⁵⁸Iroero, nopiguemisantacaganeegui, nanintane, përosati pinguemisantasanta-nëri Atingomi. Pintineri përosati, pintarobacaatineri. Pairoraca pinganque, pingantobentiri Iriro. Quero poperatasita. Quero pitsipirasita, intsibataiguëminta Atingomi, imëmi ora caninaro aisati.

Yapatotëneri Jerosaresati iguireguíte.

16 ¹Yamaica nangantocoqueri quirequi papatotëneri opiguemisantane coguitiachari canta Jerosarënuë. Oca nongomantaiguimica, aisati nocomantaguequeri quemisantatsirijegui cara Garasiaquë. ²Omagaro tomincoquë, caninataque popatotineri Jerosaresati piguireguíte. Atiraca ingaraque piguireguíte, poguineri casiriconiati ira pinintaigui pomagantineri. Aro cara naretanëmi naró, aroque ainta quirequi, arota quero nobomirintsitaigapëmi. ³Cara najáque obirojeguiquë, nasanguenaquineri Jerosaresati aisati. Aro pingoigaigue ira pigáque iráganëneri. ⁴Aisati pinintica najáte naró, aro nantsibatanëmari.

⁵Aiqueta najáque naniaigaimi, carari arotsita najátagueque canta Maseroniaquë, aique narequimi obirojeguiquë. ⁶Cara najáque obiroquë, nocoguini nantimotaiguemi cosamani, irooti omagaro tsaengaquë. Aiqueta, pomitocotaigabaquina pingábintsai-guëna atiraca najáque aisati. ⁷Teni naninte naniaiguemi omanaanti yamai. Aiqueta nocogui nantimotimi, aroca iranintacaquena Atingomi. ⁸Yamai natimaque yaca Ejesoquëca irooti cataguiqueriquë jitacha Pentecosité. ⁹Ainta tojaini yaca ira cogatsi nanguenguissatomotaiguerei ora Caninero Nibarinti. Arosónori ira quemisantaigabaquero. Aintasati tojai ira quisaneintaiguëna pégatsatina.

Paboro ibetsataigacari irapiguemisantane.

¹⁰Cara iraretanëmica Timoteo, pingábintsaiqueri irironta aisati icantina nibega nro, itinero Atingomi. ¹¹Quero poro maintirine. Carari págacaninatobëri, aisati caninasati pingábintseri arota iripigaima yaca caninasati. Noguaqueri iriro, aisati basini opiguemisantane intsibataigapëmari. ¹²Namanabecari iriáte Aporo obirojeguiquë, intsibatanëmari ira basini opiguemisantane, carari te iraninte iriáte yamai. Cara ingoqueca aiqueta, aro iriátë.

¹³Pigamaiguema. Përosati pinguemisantaiganaqueri Atingomi. Quero pitsorogaigui. Nocoguini irisintsisëretacaiguimi Tosorinti aisati pitsintsibentineri. ¹⁴Pairoraca

pingantaiguë, pinintobaganëma.

¹⁵Pigóiguëri, nopiguemisantacagane, ira Isitéjana aisati imatsiguenga. Ibataiguëri Acayasati iquemisantaiguë. Icantaiguëro caninero, icábintsai-gabaqueri imitocotaiguëri quemisantatsiri. Icábintsasitacari, te ingoicotiri.

¹⁶Ipomirintsitaca imitocotasantaiguimi pairoraca icantaguequimi. Nocoguini pinguemisantaigabaqueri iriro, aisati icantaigari ibega iriro. ¹⁷Nacaninatasantë cara yaretaiguëna Isitéjana, aisati Jorotonato, aisati Acaico. Nogasëretocoquimi, carari imitocotaigapëna aisatime ingantimime pibega obirojegui arome piritimame yaca. ¹⁸Imagoriasë retagaigapëna aisa icanta imagoriasëretagaiganaquemi cani. Caninataque pinianacanaiguerei iriro.

¹⁹Iraegui quemisantatsiri botoibiritari Atingomi yaca Asiaquë ibetsataiguimi. Aisati ibetsatasantaiguimi Aquira, Pisisira iina, aisati omagaro botoitacha canta ibangoquë iriro. ²⁰Ibetsataiguimi antagaisati opiguemisantane yaca. Cara pobetsatobaganëma, caninasati págacaninatobaganëma. ²¹Aisati nobetsataiguimi nro Paboro. Nasanguenataiguimiro arosata naati. ²²Iriáteta Sharincabeniquë ira te iranintiri Atingomi. ¡Omana, Atingomi! ¡Popoque! ²³Nocoguini ingábintsai-guemi Atingomi Jesoquisito. ²⁴Nanintasantaiguimini omagaro obironta quemisantaiguiri Jesoquisito.

Aro ocarati ora nasanguenataiguëmi. *Paboro*